

Ky është Profeti Muhamed ﴿ﷺ﴾

I dërguari i Zotit për mbarë njerëzimin





Ky është
Profeti Muhamed (a.s.)
i dërguari i Zotit për mbarë njerëzimin

Përgatiti për botim:
Instituti Shqiptar i Mendimit dhe i Qytetërimit Islam

Tiranë, 2007

Titulli i librit:

Ky është Profeti Muhamed (a.s.) - i dërguari i Zotit për mbarë njerëzimin

Këshilli botues:

Dr. Ramiz Zekaj
Prof. dr. Arian Kadiu
Bedri Telegrafi
Alban Kodra
Edvin Cami
Eris Koliqi

Redaktor: Prof. dr. Shefik Osmani

Recensent: Mr. Sulejman Osmani

Korrektor: Remzi Zeqja

Konceptimi grafik & faqosja: Aurora Shehu

Kopertina: Studio grafike "Elif"

Botimi i parë: © AIITC, 2007

ISBN : 978-99943-917-6-9

Rr. "Ali Demi", Nr. 14, Kutia Postare : 2905
Tel : ++355 04 382 156 - Fax : ++355 04 340 089
E-mail : contact@aiitc.org
Site : <http://www.aiitc.org>

Shtypur në shtypshkronjën "MILENIUMI I RI"
Adresa: Rr. "Irfan Tomini", Blloku i Vilave Selitë, Tiranë
Tel.: 00 355 4 255 522; Fax.:00 355 4 230 303,
Cel.: 0682064654

PËRMBAJTJA

Hyrje	6
-------------	---

KREU I : TA NJOHIM TË DËRGUARIN E FUNDIT 8

Origjina e Profetit Muhamed (a.s.)	8
Lindja e tij	10
Jetimi i vetmuar	10
I besueshmi	10
I denjë për t'i besuar	11
Politeistët dhe idhujt	12
Profecia	12
Shpella	13
Fillimi	14
Mospranimi	15
Edhe pse i izoluar, besimtarët ishin pranë tij	17
Viti i dëshpërimit	19
Udhëtimi i natës	19
Shpërngulja në Medinë	20
Kushtetuta e parë	21
Ithtarët e Librit	22
Leja për të luftuar	23
Beteja e Bedrit	23
Marrëveshja e Hudejbijes	24
Thirrje udhëheqësve	25
Çlirimi i Mekës	25
Arabia kthen sytë nga Islami	26
Haxhillëku i lamtumirës	27
Vdekja e Profetit (a.s.)	28
Portreti i Profetit (a.s.)	29

KREU II : PROFETI QË PËRSOSI VIRTYTET NJERËZORE .. 32

Figura e Profetit (a.s.) në Kuran	32
Kurani – burimi i parë i jetëshkrimit të Profetit (a.s.)	33
Misioni i të dërguarit	34
Dëshmitar për mbarë bashkësinë njerëzore	34
Vazhdues i shpalljeve hyjnore	35
Njerëzit i binden atij përmes forcës së besimit	35
Metoda praktike dhe stili i urtë i thirrjes	36
Fjala e mirë dhe dialogu	37
Dashuria e Profetit (a.s.) për njerëzit	38
I afërt me të varfrit dhe nevojtarët	40
Toleranca – morali i mesazhit hyjnor	41
Mirësia, kujdesi dhe orientimi i Zotit për Profetin (a.s.)	43
Qenia e Profetit (a.s.) njerëzor	44
Marrëdhënia e muslimanëve me të Dërguarin e Zotit	46
Urdhërues në të mira e ndalues në të këqija	46
Metoda e Profetit (a.s.) në përballimin e sfidave	48

KREU III : PROFETI (a.s.) NË OPTIKËN E PERSONALITETEVE BOTËRORE 50

Përmbyllje	64
------------------	----

KREU IV : DISA MËSIMET QË NXJERRIM NGA JETA E PROFETIT (a.s.) 65

Kronologjia e jetës së Profetit (a.s.)	68
Pasthënie	70
Fjalorth	72
Literatura e përdorur	81
Thënie profetike	83

Hyrje

Personalitetet ngjasojnë me malet e larta. Ata lartësohen mbi të tjerët, shihen lehtë edhe nga larg, por ngjitja në lartësi është më e gjatë dhe më e lodhshme. Udhëtari që kërkon të arrijë majën, duhet të ecë shtigjeve e rrugëve të përpjeta dhe të thepisura dhe të përballojë me durim e këmbëngulje vështirësitë dhe lodhjen sfillitëse.

Në lartësi ajri është më i freskët, më i pastër dhe horizonti më i gjerë. Në vetëdijen e popujve, malet simbolizojnë krenarinë, madhështinë, bukurinë dhe përjetësinë. Mbi majat e maleve gërshetohen vështrimet nga të gjitha pikat e horizontit.

Personaliteti i Profetit Muhamed (a.s.) është më i epërmi. Drejt kësaj maje vështrojnë fushat, vështrojnë kodrat dhe malet e tjerë të lartë për t'u orientuar. Rrugëtimi drejt kësaj maje është më i gjati po jo i mundimshëm, jo i lodhshëm, i butë dhe i këndshëm, ashtu siç ishte edhe Profeti Muhamed (a.s.). Gjatë ngjitjes udhëtari ecën përmes livadheve të mbushura me lule shumëgjyreshe ku mijëra bletë mbledhin nektarin dhe polenin. Provon kënaqësinë dhe freskinë e ujërave të pastër që rrjedhin përgjatë fajeve të malit dhe zbresin tatëpjetë përjetësisht. Dëgjon këngët e zogjve që përzihen me fëshfërimën e pyjeve shekullore. Të gjitha këto bukuri mahnitëse e ngrenë shpirtërisht udhëtarin në një botë të pastër si uji dhe ajri i këtij mali. Herë-herë majën e malit e mbulojnë retë dhe e mbështjellin me një vello të bardhë mjegulle. Ashtu i zhytur në re dhe mjegull, mali bëhet më i bukur e më madhështor dhe rrugët duket sikur shkojnë drejt qiellit. Kur retë dhe mjegulla shpërndahen, mali duket më qartazi.



Profeti Muhamed (a.s.) është personaliteti që Zoti e pajisi më gjithë bukuritë dhe lartësitë e shpirtit, me vetitë më të mira e të rralla, mendjen më të zgjuar dhe zemrën më të pastër. Nga cilado anë të vështrohet, ai rrezaton dhe shërben si model për njerëzit e kohës së tij edhe për të gjitha gjeneratat e mëvonshme të njerëzimit. Nga ky model marrin shembull e frymëzim drejt së mirës: fëmija dhe i riu, i rrituri dhe i moshuari, jetimi dhe familjari, i pasuri dhe i varfëri, tregtari dhe luftëtari, pushtetari, mësuesi dhe predikuesi, pavarësisht kohëve, vendeve, pozicioneve shoqërore, gjendjes ekonomike dhe niveleve kulturore. Në kupën qiellore yjet ndritin më mirë në natën e errët. Muhamedi (a.s.) është ylli i karvanit.

Kush orientohet nga ky yll, nuk e humbet rrugën e drejtë në botën tokësore dhe atë të përtejmen, që është e përjetshme.

Për këtë personalitet janë shkruar shumë libra nga dijetarë, historianë e biografë, në gjuhë të ndryshme të botës. Për jetën dhe veprën e Profetit Muhamed (a.s.) do të shkruhet dhe në të ardhshmen, pasi ajo është gurrë e pashtershme.

Ky libër përpiket të sjellë pak ujë prej kësaj gurre, për të shuar etjen e klimës së nxehtë që përjeton sot njerëzimi.

Botuesi

KREU I

TA NJOHIM TË DËRGUARIN E FUNDIT

Origjina e Profetit Muhamed (a.s.)

Qyteti i Mekës, prej nga e ka origjinën familja e Muhamedit (a.s.), ka qenë në vazhdimësi qendër e rëndësishme ekonomike dhe tregtare, njëkohësisht edhe qendër shpirtërore dhe fetare e Arabisë. Që nga periudhat parahistorike, arabët dyndeshin nga çdo anë dhe grupe-grupe shkonin për të vizituar Qaben, shtëpinë e Zotit.

Meka dallohej nga të gjitha qytetet e tjera arabe për shkak të pozitës së saj gjeografike. Në të gërshetoheshin rrugët tregtare mes Jemenit dhe Shamit, Bizantit dhe Persisë. Eksportimi i mallrave të këtyre vendeve bëhej nëpërmjet Mekës. Ajo ishte vendtakimi i të gjitha fiseve arabe që shkonin në haxhillëk për t'iu përgjigjur thirrjes së Ibrahimit (a.s.), i cili ishte lutur aty.

Zanafilla e qytetit të Mekës është e lidhur me vajtjen aty të Ibrahimit (a.s.) së bashku me gruan e tij, Haxher-en dhe djalin e vogël, Ismailin. Ibrahim (a.s.), bashkë me të birin, ndërtoi aty faltoren e parë islame (Qabenë) dhe Allahu (xh.sh.) e begatoi atë vend me ujin e Zemzemit. Aty Ibrahim iu lut Allahut (xh.sh.) për arabët:

“O Zoti ynë! Dërgo tek ata një të dërguar nga gjiri i tyre, që t’u lexojë shpalljet e Tua, t’ua mësojë Librin dhe Urtësinë (rregullat e fesë) e t’i pastrojë (nga gjynahet)! Vërtet, Ti je i Plotfuqishmi dhe i Urti!” ” (El-Bekare, 129)

Allahu (xh.sh.) e pranoi lutjen e Ibrahimit (a.s.) dhe e bëri



popullin e Muhamedit (a.s.) popullin më të mbarë, kurse Muhamedin (a.s.) e dërgoi si profetin e fundit.

Në Mekë jetoi Ismaili (a.s.) dhe pasardhësit e tij; deri tek Abdu Menafi, i cili zgjeroi marrëdhëniet diplomatike me vendet e tjera deri në Persi e Bizant. Në Mekë jetoi edhe djali i tij, Hashimi, që ishte i njohur për shpirtmadhësinë dhe që zgjeroi tregëtinë me vendet më të largëta të rajonit. Për të vazhduar me djalin e këtij, Abdulmutalibin, i cili vazhdoi traditën e të parëve dhe, pas shumë lodhjes, e vuri përsëri në punë pusin e Zemzemit. Kjo ngjarje e gëzoi pa masë popullin e Mekës, që prej kohësh vuante nga thatësira.

Disa vjet pas rihapjes së pusit të Zemzemit, Allahu i fali Abdulmutalibit dhjetë djem, midis të cilëve edhe Abdullahun, i cili, nga martesë me Aminën, do të lindte Muhamedin (a.s.). Për këtë lindje, bëjnë fjalë të gjithë librat qiellorë të dërguara më parë. Për këtë bën fjalë Teurati¹ i Musait, në të cilin thuhet: *“Kam dëgjuar për Ismailin, unë e përmbaj atë dhe e lajmëroj për Madmadin (Muhamedin a.s.). Nga mesi i tyre do të dërgoj një pejgamber, si ti, të cilit do t’i mundësoj të flasë me gojën time.”*

Paralajmërimet për ardhjen e Muhamedit (a.s.) bëhen edhe në Inxhil² (të Shën Gjonit) ku thuhet: *“Nëse më doni mua, kini kujdes në porositë e mia, unë do ta lus babanë dhe ai do t’ju dërgojë një pejgamber tjetër, i cili do të qëndrojë me ju përgjithmonë.”*

Në suren Es-Saff, ajeti 6, Allahu xh.sh. në mënyrë të drejtpërdrejtë na tregon se Isai (a.s.) ka paralajmëruar për Muhamedin (a.s.) kur thotë:

“Kujto kur Isai, i biri i Merjemes, tha: “O bijtë e Izraelit, unë jam i dërguari i Allahut tek ju, për t’ju vërtetuar Teuratin e shpallur para meje dhe për t’ju sjellë lajmin e gëzueshëm për një të dërguar emri i të cilit është Ahmed³ dhe që do të vijë

¹ Teurati ose Tora (Dhjata e vjetër), është libri i Zotit që iu shpall Musait a.s. (Moisiut).

² Inxhili ose Ungjilli (Dhjata e re), është libri i Zotit që iu shpall Isait a.s. (Jezusit).

³ Ahmed është një prej emrave të Profetit Muhamed (a.s.), që do të thotë “I lavdëruari”.

*pas meje". Por, kur ai u solli atyre shenja të qarta, ata thanë:
"Kjo është magji e hapur!"*

Lindja e tij

Muhamedi, i fundmi i profetëve, lindi në shkretëtirën e thatë të Arabisë, në vitin 570, afro gjashtëqind vjet pas Jezuit/Isait (a.s.). Ai lindi në fisin më të pastër dhe më të dalluar të atij populli, në familjen më fisnike e dinjitoze të atij fisi.

Jetimi i vetmuar

Muhamedi ishte jetim. Babai i tij vdiq para se ai të lindte. Pas vdekjes së babait, ai u rrit me vështirësi në shkretëtirë, sipas zakoneve arabe të asaj kohe. Kur mbushi gjashtë vjeç, i vdiq edhe nëna, Amina. Që prej atij çasti, ai u rrit nën kujdesin e gjyshit të vet, Abdul Muttalibit, kurse më vonë, nga xhaxhai i tij, Ebu Tâlibi.

Muhamedi ishte mësuar të ruante delet dhe dhinë nën diellin përvëlues, nëpër kodra, rreth e qark Mekës: Përkujdesja e tij në ruajtjen e bagëtive përmbante një porosi të lartë që dëshmonte për urtësinë dhe kujdesin e Allahut xh.sh. në përgatitjen e Profetit të ardhshëm, që do të predikonte besimin islam.

I besueshmi

Në moshë të re, Muhamedi ishte i njohur sipas të gjithëve si: *El-Emîn* "i besueshmi" (ai, tek i cili mund të mbështetesh), në saje të ndershmërisë dhe të karakterit të tij fisnik. Xhaxhai i tij e donte shumë dhe e merrte me vete në Siri, kur shkonte për çështje pune. Kjo gjë i dha Muhamedit mundësinë që të mësonte se si të fitonte bukën e gojës. Ai i drejtonte punët e veta me sukses. Edhe pse ishte relativisht i varfër, ndershmëria dhe natyra e tij bujare bënë që ta donin të tjerët dhe të fitonte besimin e të gjithë atyre njerëzve që e njihnin.

Në këtë kohë, në Mekë jetonte një nga gratë më të nderuara.



Ajo quhej Hatixhe. Muhamedi (a.s.) punoi për të e, kur mbushi moshën njëzet e pesë vjeç, ai mori nga ana e saj një kërkesë të tërthortë për martesë. Megjithëse ajo ishte më e madhe se ai, Muhamedi e pranoi ofertën e saj. Ata u martuan në vitin 595 dhe jetuan të lumtur. Me të pati dy djem dhe katër vajza: Kasimin, Abdullahin, Zejneben, Rukajën, Ummu Kulthûmin dhe Fatimen. Për fat të keq, dy djemtë vdiqën në moshë të vogël. Muhamedi me Hatixhen jetuan së bashku një jetë të lumtur familjare.

I denjë për t'i besuar

Shoqëria me Muhamedin, këshillat e urta dhe besueshmëria e tij, ishin shumë të parapëlqyera nga të gjithë. Tregohet se, në kohën kur ishte duke u riparuar Qabeja, katër fiset kryesore të klanit Kurejsh po grindeshin për të ditur se cili mes tyre do të kishte nderin të rivendoste Gurin e Zi e të shenjtë. Kur zënka ishte gati të shpërthente, një nga të moshuarit propozoi: "Personi i parë që do të hyjë, të jetë gjykatësi ynë!" Për gëzimin e tyre të madh, ata vunë re se i pari që u fut, ishte Muhamedi. "Është *El-Emîn-i*, i besueshmi" - thërritën ata. Muhamedi (a.s.) u vu në dijeni të situatës dhe kërkoi t'i sillnin një copë pëlhurë. Ai vendosi Gurin e Zi mbi copën e pëlhurës dhe kërkoi nga secili fis që të mbartnin një pjesë të pëlhurës, në mënyrë që të merrnin pjesë të gjithë në ngritjen e Gurit të Zi. Pastaj ai e vuri atë në vendin e vet. Kështu, me zgjuarsin munda t'i japë fund kësaj grindjeje dhe shmangu, për më tepër, një rrezik për gjakderdhje.

Arabët kishin cilësi të rralla. Ata ishin guximtarë, shpirtgjërë dhe të ndershëm, mirëpo gjendeshin shpesh të ngatërruar në grindje të vogla, ziheshin pa pushim, të gatshëm për të derdhur gjakun në rastin më të parë. Kishin pak respekt për njeriun e dobët, jetimin dhe vejushën dhe jepeshin vazhdimisht pas pijes dhe kotësisë. Për shkak të statusit të rëndësishëm që u jepej djemve, baballarët kishin zakonet e mbrapshtë që t'i varrosnin

të gjalla vajzat e vogla, lindjen e të cilave ata nuk e dëshironin. Politeizmi mbisundonte në botëkuptimin e tyre.

Politeistët dhe idhujt

Politeizmi ose kulti i idhujve, praktikohej në atë kohë, gati nga shumica e popullsisë. Feja e përjetshme, e lënë si trashëgim nga Ibrahim (a.s.) -adhurimi i një Zoti të Vetëm- prej kohësh ishte varrosur dhe harruar. Me kalimin e viteve, përrreth 360 idhuj dhe statuja që përfaqësonin zotër të rremë, kanë qenë vendosur brenda dhe përreth Shtëpisë së Shenjtë (Qabesë). Ata ishin zbukuruar dhe shumë prej zotërve të rremë kishin emra femërorë, si *Lât*, *Manât* dhe *Uzza*. Disa emra ishin të njerëzve të respektuar të kohës së Nuhut (a.s.), si: *Uadd*, *Suvâ*, *Ja'ûk* dhe *Nesr*, të cilët ishin të hyjnizuar dhe adhuruar për shumë vite me radhë edhe pas vdekjes së tyre. Edhe besimtarët e Musait (hebrenjtë) dhe të Isait (të krishterët) ishin larguar nga monoteizmi fillestar i Ibrahimit dhe ishin ndarë në rryma dhe sekte.

Muhamedi (a.s.) nuk mori pjesë në asnjë prej praktikave politeiste. Ai e bëri zakon shumë shpejt të tërhiqej brenda në një shpellë të izoluar, që quhej Hirâ, në rrethinat e një kodre jo larg nga Meka, për të pastruar zemrën e tij dhe për t'u lutur në zbulimin e së vërtetës. Me të vetmen zhurmë, atë të erës, zhytur në vetminë e tij, ai sodiste shenjat e universit.

Profecia

Kjo ndodhi në moshën 40-vjeçare gjatë një nate të muajit të Ramazanit. I Lartmadhëruari thirri Muhamedin në shërbimin e tij. Atë natë, e njohur me emrin *Lejlet-ul Kadr*, "Nata e Caktimit ose Nata Fuqisë".

Shpirti Besnik (engjëlli Xhibril) zbriti me vendimin e Zotit dhe me një dritë për njerëzimin: Kuranin⁴. Një kapitull i ri po fillonte për botën.

⁴ Kurani është libri më i fundit i Zotit, që iu shpall Muhamedit (a.s.).



Shpella

Hëna e bardhë, jo e plotë, po shkëlqente lart në qiell, kur papritmas, Muhamedi ndjeu praninë e dikujt. Në qetësinë e natës u dëgjua një zë: “Lexo!” Muhamedi mbeti i habitur. “Unë nuk di të lexoj” - u përgjigj ai. Kur zëri përsëriti urdhrin, u duk sikur Toka zuri të dridhej: “Lexo!” “Unë nuk di të lexoj.” E ndjeu veten të paralizuar nga frika, të pafuqishëm për të lëvizur. “Lexo”, përsëriti zëri që linte mbresë të thellë. “Çfarë të lexoj?” Pastaj, krejt papritur, ai e ndjeu veten të çliruar; koha dhe hapësira sikur mbetën pezull; qielli dhe toka, të bëra njësh.

“Lexo me emrin e Zotit tënd, i Cili krijoi (gjithçka),

e krijoi njeriun nga një droçkë gjaku!

Lexo! Zoti yt është Bujari më i madh,

i Cili, me anë të penës ia mësoi,

ia mësoi njeriut ato që nuk i dinte.” (96/1-5)

Këto ishin pesë vargjet e para të Kuranit të lavdishëm. Zëri ishte ai i engjëllit Xhibril, Shpirtit Besnik dhe të Shenjtërisë, që iu dërgua Profetit të fundit nga Zoti. Misioni i Muhamedit (a.s.), të Dërguarit të Allahut si bekim për të gjithë njerëzit, sapo mori udhë.

Profeti Muhamed (a.s.) sapo kishte marrë fjalët e para nga Zoti i tij. Kjo ndodhi në vitin 610 në shpellën Hirâ.

Ai zbriti me shpejtësi nga kodra, me fytyrën që i ndrinte nga djersa dhe me zemrën që i rrihte shumë fort. Vargjet e Kuranit jehonin akoma në shpirtin e tij. Ç’lloj vizioni kishte qenë ai? Çfarë fjalësh ishin shqiptuar?

Ai vrapoi drejt Hatixhes, duke thirrur fort: “Mbulomëni, mbulomëni!” Ajo ia ngrohu zemrën me dashuri, ndërsa ai i tregonte atë që sapo i kishte ndodhur. “Kam frikë se një e keqe më pret!”, - i tha ai. “Asnjëherë, nga Zoti”, - iu përgjigj gruaja e tij me besim. “Zoti nuk ta do asnjëherë të keqen. Ti ke marrëdhënie të mira me familjen tënde, ti ndihmon të varfrit dhe nevojtarët, ti i pret të ftuarit e tu me bujari dhe ndihmon fatkeqët në rast nevoje”. (Përcjellë nga El-Buhârî)

Disa ditë më vonë, Hatixhja e çoi te kushëriri i saj, një shkruer i ditur, që e quanin Uaraka ibn Naufel dhe që e njihte mirë Torahun/Teuratin dhe Ungjillin/Inxhilin. Pasi Muhamedi përshkroi natën e famshme, burri i moshuar, pa hezitim, tha se do të kishte qenë me të vërtetë një takim me engjëllin Xhibril, pikërisht me atë që Zoti ia kishte dërguar Moisiut/Musait (a.s.): “Do të kisha shumë dëshirë të isha i ri, për të jetuar deri në kohën kur populli yt do të të përzërë” - i tha burri i moshuar (Përcjellë nga El-Buhâri). Ai e dinte që Profeti i përmendur në Shkrimet e shenja, kishte mbërritur.

Në këtë mënyrë, filloi misioni i të fundmit të profetëve, i cili tani e tutje do të ndikonte në mbarë botën, duke shpallur një epokë të re në historinë e ndërgjegjes dhe të progresit njerëzor.

Kështu lindi Islami.

Fillimi

E para që i besoi Profetit ishte gruaja e tij, Hatixhja. Idetë e tij u ndoqën menjëherë nga kushëriri i Muhamedit, Aliu, djali i Ebu Tâlibit, i cili jetonte me ta. Disa i kundërvihen me egërsi pranimit të misionit të Muhamedit, kurse disa të tjerë ia hapin krejtësisht zemrat e tyre dhe e pranojnë thirrjen, si p.sh. miku i afërt i Muhamedit, Ebu Bekri, shërbëtori i tij Zejd dhe shumë e shumë të tjerë.

Pas një farë kohe, ndërsa Shpallja e vargjeve kuranore vazhdonte, Profetit Muhamed (a.s.) iu kërkua që të tregonte publikisht mesazhin e Islamit dhe të shpallte vargjet që i ishin zbuluar atij.

Me emrin e Allahut, të Gjithëmëshirshmit, Mëshirëplotit. Çdo lavdërim i përket Allahut, Zotit të botëve, të Gjithëmëshirshmit, Mëshirëplotit, Sunduesit të Ditës së Gjykimit. Vetëm Ty të adhurojmë dhe vetëm prej Teje ndihmë kërkojmë! Udhëzona në rrugën e drejtë! Në rrugën e atyre që u ke dhuruar mirësi e jo në të atyre që kanë shkaktuar zemërimin Tënd, as në të atyre që janë të humbur! [1/1-7]



Një ditë, Profeti (a.s.) u ngjit në majë të Safas, një kodër e vogël pranë Qabesë dhe i foli popullit, banorëve të Mekës. Ndërsa ata mblidheshin përreth tij, e pyetën se cila ishte arsyeja e ardhjes. Muhamedi iu përgjigj:

“Më thoni, o njerëz të Mekës, në qoftë se unë do t’ju thosha se shikoj një ushtri që drejtohet kundër nesh, nga ana tjetër e kodrës, ju do të më besonit mua?

- Sigurisht, - iu përgjigjën të gjithë, - sepse ne kemi besim tek ti, ti nuk gënjen kurrë.

- Atëherë, - tha më tej Muhamedi, - mësojeni se unë jam i dërguar dhe po ju njoftoj një ndëshkim të tmerrshëm... Allahu më ka kërkuar t’ju paralajmëroj ju që jeni të afërmit e mi dhe t’ju them se unë s’mund t’ju garantoj të mira si në Tokë, ashtu dhe në qiej.”

Duke dëgjuar këtë gjë, turma e njerëzve u bë e heshtur nga habia e madhe. Ndërsa ata qëndronin të palëvizur nën diellin përvëlues, Ebu Lehebi, xhaxhai i Profetit (a.s.), bërtiti: “Vdeksh ti!” Dhe të gjithë i kthyen kurrizin e u zhdukën, duke e lënë Muhamedin vetëm.

Mospranimi

Banorët e Mekës i dëgjuan këto fjalë të reja si thirrje për t’iu nënshtruar Zotit, për të hyrë në Islam. Por dilemat u shfaqën menjëherë. Shumë vetë nuk e pranuan të vërtetën ndriçuese. Pas shumë vjetësh, ata zunë ta trajtonin me përbuzje sikur të mos ishte ai që deri dje aq shumë e çmonin.

Megjithëkëtë, asnjëherë Muhamedi nuk iu përgjigj përbuzjes me përbuzje. Ai e kishte zakon të thoshte:

Ai që beson në Allah dhe në Ditën e Fundit, duhet të thotë të mirën ose të heshtë. Ai që beson në Allah dhe në Ditën e Fundit, duhet të nderojë fqinjin e tij. Ai që beson në Allah dhe në Ditën e Fundit, duhet të nderojë mikun (mysafirin) e tij. (Përcjellë nga El-Buhâri).

Pavarësisht nga qëndrimi i disa banorëve të Mekës, ai

vazhdonte qetësisht t'i ftonte bashkëqytetarët e tij në parimin bazë të Islamit: nuk ka Zot tjetër veç Allahut dhe Muhamedi është i Dërguari i Tij. Asgjë nuk e ndalte.

Thua: "Ai është Allahu, Një dhe i Vetëm! Allahu është Absoluti, të Cilit i përgjërohet gjithçka në amshim. Ai as nuk lind, as nuk është i lindur. Dhe askush nuk është i barabartë (a i krahasueshëm) me Atë!" [112/1-4]

Sa më shumë që Muhamedi i kërkonte popullit të tij që t'i bindej Zotit të Vetëm, aq më shumë udhëheqësit e fiseve të ndryshme e përbuznin atë:

A mos kërkon ai që të gjithë zotat t'i bëjë një Zot? Vërtet që kjo është një gjë e çuditshme!" [38/5]

Ajo që i çudiste më shumë, ishte se këto fjalë të padëguara e të jashtëzakonshme -vargjet e Kuranit, vinin nga një njeri që ata e dinin se ishte i pashkolluar. Asnjëherë Muhamedi (a.s.) nuk kishte mësuar të lexonte ose të shkruante; pak arabë ishin në gjendje për këtë gjë në atë kohë. Atëherë, si është e mundur që këto fjalë të pangjashme me asgjë tjetër për sa i përket ndërtimit të tyre, mund të dilnin nga goja e tij?

Udhëheqësit e fiseve më të fuqishme të klanit Kurejsh në Mekë u bënë edhe më të paduruar. Gjatë një mbledhjeje tjetër, ata vendosën t'i kërkonin Ebu Tâlibit, xhaxhait dhe mbrojtësit të Profetit (a.s.), që të përpiqej për ta ndaluar Muhamedin në ushtrimin e misionit të vet, që u kërkonte njerëzve të hiqnin dorë nga zakonet dhe feja e baballarëve të tyre.

Kur Muhamedi e dëgjoi këtë gjë, u emocionua shumë, sepse ai ndiente shumë dashuri dhe dhembshuri për xhaxhanë e tij, mirëpo përgjigja e tij ishte e qetë dhe e pastër:

"Për Allahun! Nëse ata vendosin Diellin në dorën time të djathtë dhe Hënë në dorën time të majtë, unë kurrë nuk do ta braktisja misionin, derisa Allahu të më japë fitoren ose deri në vdekjen time."

Dalëngadalë dhe një e nga një, numri i muslimanëve të udhëhequr nga Profeti fisnik, rritej. Grupi i parë i besimtarëve



ndoqi rrugën e së vërtetës dhe të bindjes. Dashuria e tyre për të vërtetën shkëlqente, duke ndriçuar shoqërinë e zbehtë pagane të asaj kohe. Kërkimi i të mirave materiale - objektivi kryesor dhe qëllimi i të gjitha ambicieve në botë, - u zëvendësua me kërkimin e dritës dhe urtësisë së përjetshme.

“Cilitdo që kërkon rrugën e diturisë, Allahu do t’ia lehtësojë rrugën e Xhenetit”, ka thënë Profeti (a.s.). (Përcjellë nga Muslimi)

Muslimanët ishin objekt i përndjekjeve qysh në hapat e parë të Islamit. Ata që ishin të varfër, ata që kishin pak të holla dhe jo status shoqëror, vuanin shumë më egërsisht se të tjerët. Ata vireshin në lojë dhe talleshin dhe, kur kjo gjë nuk mjaftonte, jobesimtarët kishin të drejtën e përdorimit të sulmeve dhe torturave fizike. Ata qëlluan me gurë dhe me ndyrësira Bilalin, një skllav zezak nga Abisinia, i cili kishte pranuar fenë islame, e lidhën me litar në rërën përvëluese me urdhër të pronarit të tij dhe i vendosën gurë të mëdhenj mbi gjoks. “Ku është Zoti yt, tani?” - e pyesnin atë, duke u tallur. Mirëpo asnjë torturë nuk mund ta trondiste besimin e tij.

Në vitin 615, disa qindra muslimanë arritën të largoheshin nga Meka, duke braktisur shtëpitë e tyre dhe kërkuan strehë në Abisininë fqinje (Etiopia e sotme), tokë e krishterë. Në Abisini jetonte një mbret i drejtë dhe tolerant, i cili u dha strehë muslimanëve gjatë vitit të pestë të ushtrimit të misionit të Muhamedit (a.s.). Ata që s’ikën dot, iu nënshtruan përndjekjeve shumë më të dhunshme, mirëpo asnjëherë besimtarët nuk hoqën dorë nga Islami.

Edhe pse i izoluar, besimtarët e tij shtoheshin

Udhëheqësit e Mekës vendosën të zbatonin një taktikë të re. Profeti dhe Shokët e tij ndiqeshin dhe detyroheshin të jetonin të izoluar. Asnjë ushqim nuk u shkente; ata vuanin nga uria dhe etja për periudha të gjata kohe, nuk hanin pothuajse asgjë gjatë shumë ditëve, madje, gjatë shumë javëve.

Kjo bllokadë filloi në vitin e shtatë të Shpalljes Hyjnore dhe

zgjati tre vjet me radhë. Megjithatë, me ndihmën e Zotit, disa persona vullnetmirë midis përndjekësve nuk mund ta duronin më tej këtë sjellje antinjerëzore. Situata ndryshoi disi dhe bllokada u hoq, më në fund.

Zakonet dhe traditat e shoqërive fisnore të Arabisë u tronditën dhe u rivlerësuan në dritën e frymës së drejtë të mësimave të tij. Në një rast ai tha:

“Ndihamoje vëllanë tënd, qoftë kur është i drejtë ose i padrejtë.”

Një burrë pyeti:

- O i Dërguar i Allahut! Unë mund ta ndihmoj, në qoftë se është i drejtë, por, si mund ta ndihmoj, në qoftë se është i padrejtë?

Ai u përgjigj:

- Mos e lër të bëjë padrejtësi, kështu do ta shprehësh ndihmën tënde për të.” (Përcjellë nga El-Buhâri)

Mirësjellja dhe dhembshuria e Muhamedit ishin të pakrahasueshme. Shpesh, kur ai kalonte para një grupi fëmijësh, u përkëdhelte kokën dhe ndonjëherë luante bashkë me ta. Ai thotë:

“Vërtet që tek Allahu gjenden njëqind mëshira dhe vetëm njërën prej tyre Ai e ka zbritur midis xhindeve, njerëzve, kafshëve dhe insekteve. Nëpërmjet saj ata duhen dhe i bëjnë mirë njëri-tjetrit dhe nëpërmjet saj egërsira e do të voglin e vet. Kurse nëntëdhjetë e nëntë mëshirat e tjera Allahu i ka ruajtur për t’u bërë mirë robërve të Tij në Ditën e Gjykimit”

(Përcjellë nga El-Buhâri dhe Muslimi)

Ai i dha një vend të nderuar gruas në shoqëri, gjë që ishte e paimagjinueshme për kohën, duke i garantuar asaj të drejta dhe liri që nuk gjenden në asnjë vend tjetër. *“Xheneti ndodhet në këmbët e nënave”*, thotë Profeti (Përcjellë nga El-Buhâri dhe Muslimi). Mirëpo pjesa më e madhe ngulnin këmbë në injorancën e tyre dhe vazhdonin të mos i pranonin ato.



Viti i dëshpërimit

Kjo ndodhi në vitin e dhjetë të Shpalljes, më 619, kur Muhamedi (a.s.) u dëshpërua më tepër se kurrë në jetën e tij: xhaxhai, Ebu Tâlibi, i cili e kishte mbështetur dhe mbrojtur, u nda nga jeta. Kjo humbje e madhe u pasua shumë shpejt nga vdekja e gruas së tij të dashur, Hatixhja.

Me humbjen e këtyre dy mbështetjeve të rëndësishme, politeistët menduan se, më në fund, Profeti (a.s.) ishte thyer në mënyrë përfundimtare. Profeti, edhe pse ishte shumë i pikëlluar nga humbja e dy njerëzve të dashur për të, iu fut punës në kërkim të mbështetësve, për t'i mbrojtur pasuesit e tij nga banorët e Mekës.

Ai vendosi që të shkonte në Taif, një qytet që ndodhej në lindje të Mekës, duke bërë tri ditë rrugë (njëqind e njëzet kilometra, në rrugën e Jemenit). Ai nuk vuri në dijeni asnjë njeri tjetër, përveç Zejdut që e shoqëroi. Aty qëndroi dhjetë ditë, mirëpo populli i Taifit e kundërshtoi atë që kishte shkuar për të shpallur mesazhin e Islamit dhe e përzuri egërsisht, duke e qëlluar me gurë dhe duke e gjakosur. *“...Përse ky Kuran nuk i është zbritur ndonjë njeriu të rëndësishëm në një nga këto dy qytete?”* [43/31], kundërshtonte paria e këtij qyteti.

Gjatë rrugës së kthimit për në Mekë, engjëlli Xhibril e takoi Profetin (a.s.) dhe i tha:

“Zoti më ka ngarkuar që të ndëshkoj banorët e këtij qyteti për të keqen që të kanë bërë.”

“Unë dua që Allahu të nxjerrë prej tyre pasardhës që besojnë Allahun e nuk i bëjnë shok asgjë”, iu përgjigj Profeti (Përcjellë nga *El-Buhâri*).

Në këtë kohë vështirësish të mëdha, Profetit iu dha nderi më i madh nga Zoti i Tij i Lartmadhëruar, Udhëtimi i mrekullueshëm i natës.

Udhëtimi i natës

Në vitin 621, gjatë asaj nate tepër të çuditshme që quhet “Nata

e *Isrâ-s* dhe *Mi'râxh-it'*", engjëlli Xhibril e gjeti Muhamedin (a.s.) dhe e zgjoi. Ai e ftoi që t'i hipte një kafshe me emrin *Burâk*. Papritur, Profeti lëvizi me një shpejtësi të paparë deri në Xhaminë Aksâ, në Jeruzalem. Në këtë vend të shenjtë, në zemër të Jeruzalemit, Muhamedi (a.s.) takoi një kuvend profetësh të së kaluarës dhe drejtoi lutjen e tyre të zakonshme. Pastaj, engjëlli Xhebrail e mori dhe e ngjiti përtej shtatë qiejve, që ai të jetë dëshmitari i mistereve të padukshme të universit, si dhe të arrijë që të sodisë disa shenja të Zotit të tij.

Më pas, Muhamedi (a.s.) dhe engjëlli Xhibril u ngjitën përmes qiejve të tjerë, duke takuar profetë të tjerë: Isanë, Jahjanë, Jusufin, Harunin dhe Musanë (paqja qoftë me ata), derisa, më në fund, mbërritën në qiellin e shtatë. Aty ishte një njeri i ulur në një fron në derën e banesës së përjetshme.

"Kurrë nuk kisha parë një njeri që më ngjante aq shumë,- tha Profeti - Ky ishte babai im, Ibrahim..." (Përcjellë nga Muslimi dhe Ibn Is'haku)

Muhamedi (a.s.) u ngjit në zenit të botës qiellore. Kjo ndodhi gjatë asaj nate kur ai mori nga Allahu i Lartmadhëruar ritualin suprem të trupit dhe të shpirtit, shtyllën e dytë të Islamit: pesë lutjet e përditshme dhe diçka që nuk i ishte dhënë ndonjë profeti tjetër para tij, botën e tërë si një hapësirë për t'u falur në shenjë nderimi dhe bekimi për të gjithë muslimanët.⁵

Shpërngulja në Medinë

Banorët e qytetit të Jethribit (rreth 450 km larg Mekës), të cilët tashmë kishin pranuar fenë islame, i hapën dyert e shtëpive të tyre për mërgimtarët e besimit, duke u uruar mirëseardhjen të gjithë muslimanëve që dëshironin të jetonin të sigurt në qytetin e tyre. Ata donin, në mënyrë të veçantë, që Profeti (a.s.) të shkonte atje dhe të sillte paqen në qytetin e tyre, i cili vazhdimisht gërryhej nga brenda prej grindjeve të

⁵ Kjo njihet në terminologjinë islame si *El-Isrâ'* dhe *El-Mi'raxh*, (udhëtimi natën dhe ngjitja).



fiseve. Profeti (a.s.) pranoi t'ua plotësonte atë dëshirë. Ky mërgim u quajt *El-Hixhrah* - shpërngulja dhe ishte një moment vendimtar në historinë e Islamit, **momenti i fillimit të kalendarit islam, i lindjes së Shtetit të parë islam**. Nga kjo kohë Jethribi u quajt *Medînet-un Nebijj "Qyteti i Profetit"*.

Muhamedi, i Dërguari i Zotit, pas trembëdhjetë vjetësh të thirrjes së Islamit dhe pasi kishte vuajtur shumë prej përndjekjeve të arabëve paganë, e braktisi qytetin e Mekës, i shoqëruar nga shoku i tij i ngushtë, Ebu Bekri dhe u nis për atje ku i kishin ofruar paqen dhe sigurinë, në qytetin e Medinës.

Në këtë mënyrë, në vitin 622, në vitin 1 të Hixhretit nisi etapa e dytë, shumë e rëndësishme e misionit dhe e jetës së Muhamedit (a.s.).

Kushtetuta e parë

Në qytetin e Medinës, Profeti (a.s.) u bë kryetari i shtetit të parë Islam. Aty besimi i muslimanëve arriti të lulëzojë, duke bërë të mundur lindjen e një rendi të ri shoqëror. Në Medinë u zhvillua më tutje vizioni islam i paqes ndërmjet popujve të ndryshëm të botës pa dallim feje dhe race, sepse me të vërtetë aty mori formë **Kushtetuta e parë** dhe **Karta e të drejtave** dhe lirive njerëzore, e cila nuk kishte ekzistuar asnjëherë më parë. Ajo i garantonte çdo qytetari lirinë, sigurinë dhe drejtësinë.⁶

Karakteristika themelore e kësaj shoqërie të re ishte mirësjellja dhe përkushtimi. Makutëria dhe egoizmi u zëvendësuan nga dhembshuria dhe kujdesi për të gjitha qeniet e gjalla. Profeti (a.s.) thotë:

"Të vësh drejtësi mes dy vetave, është një lëmoshë; të ndihmosh një njeri të ngjitet në kalë dhe t'i ngresh barrën

⁶ Disa nga porositë e kësaj karte, ishin:

- Liria e ndërgjegjes dhe e besimit për muslimanët dhe jomuslimanët është njëlloj.
- Siguria dhe mbrojtja e të gjithëve nga çdo kërcënim apo sulm që vjen nga jashtë.
- Dënimi dhe shfuqizimi i të gjitha praktikave të pamoralshme.

është një lëmoshë; t'i përgjigjesh një pyetjeje me butësi është një lëmoshë; të heqësh atë që përbën rrezik në udhën e njeriut (si gjemba ose gurë) është një lëmoshë; t'i buzëqeshësh vëllait është lëmoshë.” (Përcjellë nga El-Buhâri dhe Muslimi)

Në Medinë u vendosën edhe dy shtylla të tjera të Islamit. Iu kërkua muslimanëve të paguanin zeqâtin⁷, (2/177; 9/60), dhe të praktikonin agjërimin e muajit të Ramazanit, *es-sijâm* (2/183-187).

Gjatë kësaj kohe, Profeti (a.s.) u martua përsëri. Me përjashtim të Aishes, bashkëshortet e tij ishin përgjithësisht vejusha. Megjithatë, ai ruajti përgjithmonë në zemrën e tij një vend të veçantë për Hatixhen, gruan e parë, shoqen e tij të shtrenjtë.

Ithtarët e Librit

Në rrethinat e qytetit të Medinës jetonin gjithashtu edhe disa fise çifute. Muslimanët tanimë ndienin një lloj afërsie me këta “njerëz të Librit”, të cilëve mbërritja e një profeti u ishte lajmëruar në Torah/Teurat. Zoti i kishte thënë Mûsâ-it:

“Do të bëj midis vëllezërve të tyre një profet të ngjashëm me ty dhe do t'i vendos në gojë fjalët e Mia dhe ai do t'u thotë atyre gjithçka që unë do t'u kërkoj.” [Deuteronomi 18/18]

Po kush ishin në Testamentin e Vjetër vëllezërit e bijve të Izraelit, përveçse bijtë e Ismailit? Po kush tjetër do të mund të ishte Profeti që ngjante me Musanë? E kush pra do t'i ngjante atij më shumë sesa Muhamedi (a.s.)? Dhe sipas fjalëve të Jezusit, profecia ishte kryer:

“Në qoftë se unë nuk do të iki, Parakleti, Ngushëllimtari, kurrsesi nuk mund të vijë tek ju, mirëpo, në qoftë se unë do të largohem, do t'ju dërgoj... Ai do t'ju udhëheqë drejt së Vërtetës; sepse ai nuk do të flasë kurrë për veten e tij, por do të tregojë vetëm atë që do të dëgjojë” [Gjoni: 16/17 dhe 16/13]

⁷ Zeqati, është një taksë shoqërore për t'u ardhur në ndihmë të varfërve dhe nevojtarëve.



Besimtarëve tanimë iu kërkua që të ktheheshin në drejtim të Mekës, nga Qabeja [2/144-150].

Ky ndryshim në lidhje me drejtimin gjatë lutjes, ishte simboli i dallimit dhe i nderimit që iu bë komunitetit të ri të muslimanëve: umetit islam. Muslimanët, duke pasur besimin fillestar të Ibrahimit, u kthyen në mënyrë të natyrshme nga Shtëpia e parë.

Leja për të luftuar

Të pakënaqur nga ky ndryshim, nuk ishin vetëm njerëzit e Librit (disa çifutë në të vërtetë e kishin marrë argumentin e drejtimit nga Jeruzalemi, për të sugjeruar se Muhamedi nuk kishte tjetër mundësi veçse të ndiqte *kibla*-n e tyre dhe për të thënë se kjo gjë provonte faktin se feja e tyre ishte më e lartë), por edhe udhëheqësit e qytetit të Mekës, ndryshimi i *kibla*-s paraqiste një kërcënim, pasi ata pretendonin të drejtën e të qenit mbrojtësit e Qabesë.

Këta të fundit, vazhdimisht ishin të vendosur për ta asgjësuar komunitetin e ri musliman, ndaj përgatitën një sulm kundër Medinës. Këtë radhë, më në fund, pas shumë vite persekutimesh dhe torturash, zbriti verseti Kuranor, ku Profeti (a.s.) iu dha leja për t'u mbrojtur:

U lejohet (lufta) atyre që janë sulmuar, ngase u është bërë padrejtësi dhe Allahu, me të vërtetë, është i Fuqishëm që t'i ndihmojë. [22/39]

Beteja e Bedrit

Përfundimi ishte beteja e Bedrit, e cila u zhvillua në vitin 623, gjatë vitit të dytë të Hixhretit, në muajin e Ramazanit. Ushtria e Mekës, e përbërë nga mijëra burra, tri herë më shumë se kundërshtari i saj - sulmoi ushtrinë e vogël të muslimanëve. Mirëpo, me Vullnetin hyjnor, përfundimi i kësaj beteje ishte një fitore madhështore e muslimanëve. Disa udhëheqës të Mekës, të cilët kishin persekutuar muslimanë, u vranë, kurse

të tjerët u burgosën, duke paguar kështu një çmim të lartë.

Për herë të parë në histori, të burgosurve të luftës u jepej ushqim dhe mbrojtje po aq sa edhe rrëmbyesve të tyre, por edhe një trajtim i njerëzishëm. Kjo betejë ishte përcaktuese: forca dhe guximi i besimtarëve muslimanë lanë pa mend kundërshtarët e tyre të Mekës bashkë me aleatët, edhe pse ata ngulmonin për ta shkatërruar Islamin.

Betejë pas beteje, muslimanët arritën të provojnë se ata mund t'i rezistonin çfarëdolloj sulmi. Megjithatë, ata arritën t'i shpëtonin një shpartallimi kur duhej: vitin që vijoi, në kohën e betejës së Uhudit, që u dha kurejshëve idenë për t'i sulmuar dhe për t'i shfarosur një herë e përgjithmonë. Këta të fundit komplotuan me disa beduinë, me disa fise çifute si dhe me disa hipokritë që jetonin në Medinë.

Kjo ndodhi gjatë vitit të pestë të Hixhretit, kur një ushtri me më shumë se dhjetë mijë vetë u drejtua për në Medinë. Mirëpo muslimanët ishin të gatshëm për t'u mbrojtur. Sipas këshillave të Selman Farisiut, ata kishin gërmuar një hendek të gjerë në veri të qytetit, sepse anët e tjera të Medinës ishin të mbrojtura nga objekte të ndryshme. Vetë Profeti mori pjesë në përgatitjet për hapjen e hendekut, i cili përfundoi në gjashtë ditë.

Pas një muaji të gjatë rrethimi, kundërshtarët nga Meka gjithmonë e më shumë po dështonin për të depërtuar brenda qytetit e, për këtë arsye, filluan ta humbasin qetësinë. Pak nga pak mosbesimi zuri të përhapej midis radhëve të forcave aleate. Si pasojë e grindjeve që shpërthyen mes tyre, si dhe nga kushtet e vështira atmosferike, ata zunë të mblidhnin çadrat dhe më në fund u tërhoqën.

Marrëveshja e Hudejbijjes

Kjo ishte një fitore e madhe për Islamin. Qyteti i Medinës nuk u sulmua më kurrë. Një vit më pas, i gjashti pas Hixhretit, u dekretua një armëpushim midis udhëheqësve të Mekës dhe Profetit (a.s.), megjithëse kushtet e tij ishin pa asnjë dyshim në favor të Kurejshëve. Kjo u quajt marrëveshja e Hudejbijjes.



Periudha e paqes që vijoi më pas, u dha mundësi jomuslimanëve të shumtë që të shikonin vetë mirësitë e mënyrës së jetesës islame. Për këtë arsye, një numër shumë i madh nga Meka, si dhe pjesëtarë të fiseve të ndryshme, përqaftuan Islamin.

Thirrje udhëheqësve

Gjatë kësaj kohe, Profeti (a.s.) u dërgoi letra qeveritarëve të shumtë, midis të cilëve edhe perandorëve të dy superfuqive të kohës, Persisë dhe Bizantit, duke i ftuar ata në Islam.

Perandori Herakli ishte duke udhëtuar në Jeruzalem, kur mori letrën që mbante vulën e Profetit. Ai lexoi:

"Nga ana e Muhamedit, i Dërguari i Allahut.

Herakliut, perandorit të Bizantit! Paqja qoftë me atë që ndjek udhën e vërtetë. Unë të ftoj në Islam. Pranoje atë e do të kesh paqe e mbarësi, ndërsa Zoti do të ta shpërblejë dyfish. Nëse ti nuk e pranon, gjynahet e njerëzve të tu do të bien mbi ty." [Përcjellë nga El-Buhâri]

Dhe letra përfundonte me një paragraf nga Kurani:

"Thuaj: "O ithtarët e Librit, ejani të biem në një fjalë të përbashkët mes nesh dhe jush: se do të adhurojmë vetëm Allahun, se nuk do t'i shoqërojmë Atij asgjë (në adhurim) dhe se njëri-tjetrin nuk do ta mbajmë për zot, në vend të Allahut!" Nëse ata nuk pranojnë, atëherë thuaju: "Dëshmoni se ne i jemi nënshtruar Allahut!"" [3/64]

Edhe pse perandori e kuptoi se ishte fjala për Profetin e lajmëruar nga Shkrimet e Shenjta, ai u ndje i detyruar nga besnikëria kundrejt udhëheqësve dhe oborrtarëve të tij, të mos e pranonte Mesazhin.

Çlirimi i Mekës

Gjatë kësaj kohe, në Arabi, forca e Islamit rritej me shpejtësi. Dy vjet pas marrëveshjes së arritur me kundërshtarët nga

Meka, kushtet e së cilës shkeleshin vazhdimisht nga Kurejshët, Profeti (a.s.) vendosi të marshonte për në Mekë me një ushtri të përbërë me afro dhjetë mijë vetë.

Ajo çka ndodhi atëherë, qe një fakt i paharrueshëm në historinë e fitoreve fetare. Profeti (a.s.) hyri në Mekë pa derdhur asnjë pikë gjaku. Ai e kapërceu portën e qytetit i hipur në devenë e tij, me kokën ulur në shenjë përulësie, ndërsa të gjithë mekasit e vështrojnë. Për çudinë e tyre të madhe, ai i fali të gjithë ata që ishin armiqtë më të mëdhenj dhe shpalli një amnisti të përgjithshme. Kjo ishte dita e fitores dhe fundi i simboleve të idhujtarisë në këtë qytet të shenjtë. Kështu përfundoi çlirimi i Mekës.

Armiqu të Islamit u dorëzuan dhe njëkohësisht u falën me shpirtmirësi. Dëshmitarët e kësaj mëshire dhe dhembshurie të Profetit (a.s.), banorët e qytetit të Mekës, e përqaftuan pa hezitim Islamin. Profeti hyri brenda Qabesë, ku gjendeshin treqind e gjashtëdhjetë idhuj e statuja që paraqisnin perënditë e gënjeshtërtë, përpara të cilave arabët faleshin dhe që i adhuronin prej shumë kohësh. Një e nga një, me urdhër të Profetit, idhujt u shkatërruan. Kjo u dha fund simboleve të idhujtarisë në Gadishullin Arabik.

Më në fund, Qabeja, e ngritur nga Profeti Ibrahim dhe nga djali i tij i parë Ismaili, u pastrua dhe iu kushtua adhurimit të Zotit të Vetëm, Allahut, Zotit të Botëve.

“Allahu është Ai që e ka çuar të Dërguarin e Vet me udhërrëfimin dhe fenë e së Vërtetës, për ta ngritur atë më lart se të gjitha fetë, edhe nëse nuk e pëlqejnë idhujtarët” [61/9]

Arabia kthen sytë nga Islami

Misioni i Muhamedit (a.s.) po arrinte fundin e tij, ndërkohë ai kthehet në Medinë, e cila bëhet kryeqyteti i botës së re muslimane. Nga e gjithë Arabia, vinin delegacione për te Profeti (a.s.) për të përqaftuar Islamin. Për më tepër, ai dërgoi



grupe besimtarësh në vende dhe në provinca të ndryshme, duke u bërë thirrje banorëve të tyre që të përqaфонin Islamin.

Megjithatë, edhe pse ishte në krye të të gjithë Arabisë dhe të viseve përqaфon, Muhamedi (a.s.) vazhdoi të jetonte si një shërbëtor i përqafur i Zotit. Ai ishte mësuar t'i rregullonte këpucët e veta, të qepte rrobat e veta e t'i shërbente thjeshtësisht familjes së vet.

Haxhillëku i lamtumirës

Ky ndodhi dhjetë vjet pas Hixhretit; Profeti po i afrohej fundit të jetës së vet në këtë Tokë. Ky ishte ai vit gjatë të cilit ai kreu haxhillëkun, shtyllën e pestë të Islamit. Nën diellin përvëlues, nëpër rrafshinat e Arafatit, Profeti Muhamed (a.s.) dha predikimin e tij të fundit:

“O njerëz! Dëgjoni me vëmendje fjalët e mia dhe kuptojini ato, sepse unë nuk e di nëse do të mund t’ju takoj më në këtë vend pas një viti.

O njerëz! Gjaku juaj, pasuritë tuaja dhe nderi juaj duhet të jenë gjëra të shenjta njëlloj si kjo ditë e shenjtë, në këtë muaj të shenjtë dhe në këtë territor të shenjtë, gjersa ju të takoni Zotin tuaj! Ju do të shkoni pa dyshim, që të takoni Zotin tuaj dhe do të pyeteni për veprimet tuaja. Jini vigjilentë, pra! A jua kam sjellë me besnikëri Mesazhin? O Zot, qofsh Dëshmitar!

Kushdo që merr diçka në mirëbesim, le t’ia kthejë sërish atij që ia kishte lënë në besim. Mos tërhiqni asnjë interes në të holla të marra hua, siç bënim kur ishim të paditur; por ju do të keni të drejtë mbi kapitalet tuaja; mos u bëni as shtypës, as të shtypur... E drejta e gjakmarrjes së kohës së paditurisë është zhdukur dhe të vdekurit e saj nuk do të shpaguhen...

O njerëz! Djalli ka humbur çdo shpresë për t’u adhuruar në tokat tuaja. Megjithatë, ai do të kërkojë që t’ju mashtrojë për shkak të punëve tuaja të vogla. Jini vigjilentë, pra, nga ai për sigurinë e besimit tuaj... A jua kam përcjellë me besnikëri Mesazhin? O Zot, qofsh Dëshmitar!

Në të vërtetë, koha është kthyer në gjendjen e saj fillestare, në të cilën Allahu e kishte krijuar ditën kur ai krijoi qiejt dhe Tokën. Numri i muajve, sipas Allahut, është dymbëdhjetë; midis tyre, katër janë të shenjtë, gjatë të cilëve lufta dhe betejat janë të ndaluara...

O njerëz, gratë tuaja kanë të drejtë mbi ju, sikurse ju keni të drejtë mbi ato...Trajtojini gratë me butësi! Ato janë partneret tuaja si dhe mbështetëset tuaja pa interes...Ju i keni marrë amanet nga Allahu dhe kënaqësia e tyre ju lejohet vetëm me një leje nga Zoti. Jini pra të devotshëm me atë që u përket grave, duajini të mirën atyre. Jua bëra të ditur Mesazhin? O Zot, qofsh Dëshmitar...

O njerëz! Kam lënë midis jush një orientim të qartë, atë që, nëse ju e shtrëngoni fort, do t'ju mbrojë nga shthurja, Librin e Allahut dhe Traditën e Profetit të Tij (Sunetin).

O njerëz! Çdo besimtar duhet të jetë një vëlla i vërtetë për çdo besimtar tjetër. Pasuritë e një vëllai janë të paprekshme, veçse kur ai pranon t'i japë me dëshirë. Mos e gënjeni njëri-tjetrin."

Profeti ngriti gishtin e tij tregues drejt qiellit, pastaj në drejtim të turmës e thirri: "O Zot, qofsh Dëshmitar! O Zot, qofsh Dëshmitar!" Dhe shtoi: "Le tua dërgojnë të pranishmit këtë mesazh të munguarve!"

Atëherë u shpallën disa nga fjalët e fundit të Kuranit:

Sot jua përsosa fenë tuaj, e plotësova dhuntinë Time ndaj jush dhe zgjodha që Islami të jetë feja juaj! [5/3]

Vdekja e Profetit (a.s.)

Disa muaj më vonë, në vitin 632 (në vitin e dhjetë të Hixhretit), Allahu i Lartmadhëruar thërriti shpirtin e Profetit Muhamed (a.s.). Ai vdiq në moshën 63-vjeçare, në shtëpinë e tij në Medinë, duke lënë pas vetes vetëm pak pasuri, botën nën këmbët e veta dhe asnjë dinar në emër të tij [Përcjellë nga El-Buhâri].



Fryma e mesazhit të tij mbetet edhe sot po aq e qartë dhe aq e gjallë sa atëherë kur u shpall; aq sa qenia njerëzore mund të jetë dëshmitari i mrekullisë së jetës së tij, i misionit të tij, i bukurisë dhe përsosmërisë së thirrjes së tij:

Lâ ilâhe il-lAllâh, Muhammedun resûl Allâh.

S'ka Zot tjetër, veç Allahut, Muhamedi është i Dërguar i Allahut.

Portreti i Profetit (a.s.)

Profeti (a.s.) nuk la portret fizik apo fotografi. Kjo lidhet me parimet themelore mbi të cilat ndërtohet besimi islam.

Vlera e personalitetit të Muhamedit (a.s.) nuk qëndronte vetëm në pamjen e jashtme, por edhe në vetitë e brendshme të tij, në moralin e lartë, në idetë dhe mesazhet që ai i përcolli njerëzimit. Kjo bëri që bashkëkohësit dhe shokët e Profetit (a.s.) t'u përcillnin me kujdesin më të madh brezave që do të vijnë, kujtimet dhe përshtypjet e tyre të pashlyeshme nga jeta intime, familjare e shoqërore dhe rreth tipareve fizike të Profetit (a.s.) Këto tipare demonstرون karakterin, moralin, edukatën, zgjuarsinë, vendosmërinë dhe fisnikërinë e tij.

Profeti (a.s.) ishte me shtat pak më shumë se mesatar, kishte trup të rregullt.

Gjoksin e kishte të gjerë, midis dy shpatullave të forta mbante vulën e profecisë.

Ngjyrën e lëkurës e kishte të bardhë. Fytyrën e kishte të bukur dhe vezake. Aty dalloheshin lehtë shenjat e gëzimit dhe të dëshpërimit. Nuk i ndahej buzëqeshja. Ballin e kishte të gjerë, vetullat të holla e të plota, qerpikët e gjatë e të dendur, si të ishin ngjitur me njëri tjetrin; hunda e rregullt shkonte poshtë në mënyrë harmonike; gojën e kishte jo të madhe, buzët e holla e të kuqërremta, dhëmbët të bardhë.

Mes vetullave ndodhej një damar që fryhej rrallëherë kur zemërohej. Sytë i kishte të zinj e të mëdhenj. Flokët kaçurrela dhe të zeza shpeshherë i binin mbi supe në formë gërsheti, por më shumë i mbante të shkurtër, sa arrinin deri tek veshët.

Mjekrën e linte të rritej, nuk e priste, por gjithmonë e krihte me kujdes. Mustaqet i priste shkurt. Kur Profeti (a.s.) ndërroi jetë, në flokë dhe në mjekër i numëroheshin pak thinja.

Kishte një zë të bukur që dëgjohej e kuptohej. Fliste ngadalë dhe çështjet e rëndësishme i përsëriste deri në tri herë.

Ecte drejt, me hap të sigurt e të shpejtë; kur i duhej, kthehej mbrapa me gjithë trupin.

Kur bashkëbisedonte me të tjerët, i shikonte drejtë e në sy, u qëndronte aq pranë sa t'u vendoste dorën e djathtë në sup; asnjëherë nuk ishte i pari që t'ua kthente shpinën shokëve, kur largoheshin.

Të gjithë historianët dhe studiuesit që u morën me trashëgiminë e tij, thonë se Profeti (a.s.) bënte një jetë shumë të thjeshtë.

Muret e shtëpisë së tij ishin prej balte. Çatia mbulohej me degë palmash. Flinte mbi një lëkurë ose dyshek të mbushur me kashtë hurmash Arabie.

Ushqimi i tij i rregullt ishte hurma e Arabisë dhe qumështi. I pëlqente mjalti dhe mishi, por i përdorte këto rrallë.

Gjithnjë hante dhe pinte me dorën e djathtë, gotën e ujit e pinte tri herë me ndërprerje.

Veshja e tij e thjeshtë përbëhej prej një këmishe dhe një copë pëlhure që e mbështillte rreth belit dhe që i shkonte deri poshtë gjurit ose prej një këmishe dhe një palë pantallonash.

Ndihmonte rregullisht në punët e shtëpisë. Ndizte vetë zjarrin, fshinte shtëpinë, milte dhitë, arnonte rrobat dhe qepte këpucët.

Në portretin profetik kishte një përputhje të plotë e harmoni pamja fizike me botën e tij shpirtërore. Ishin pikërisht virtytet shpirtërore të Profetit (a.s.) që e rendisin dhe bëjnë atë më të madhin personalitet të njerëzimit. Në kurmin e tij të pastër bashkoheshin në një vitaliteti, bujaria, ndjeshmëria, drejtësia: kishte një pamje të bukur, një botë shpirtërore të përsosur dhe një trup të pashoq.



Profeti (a.s.) nuk thoshte fjalë të tepërta, çdo fjalë e tij ishte këshillë e urtësi.

Profeti (a.s.) ishte i butë, i matur, modest. Ai nuk e tepronte në të qeshur, nuk qeshte me të madhe. Ai ishte gjithmonë i buzëqeshur.

Tek njerëzit ai vlerësonte sjelljen, moralin, formimin dhe edukatën e tyre. Të njohurve u bënë vizita dhe u dërgonte dhurata.

Profeti (a.s.) ishte vazhdimisht i mendueshëm. Ai nuk fliste kur nuk ishte e nevojshme. Heshtja e tij ndonjëherë vazhdonte gjatë. Kur fillonte të fliste, mendimin nuk e linte të papërfunduar. Shume ide e mendime i shprehte në mënyrë të qartë e koncize. Fjalët i dallonte mirë nga njëra-tjetra.

Zemërohej rrallë dhe në ato raste kur bëheshin padrejtësi e thuheshin të pavërteta ose bëheshin dëshmi të rreme; kur zemërohej nuk ngrihej nga vendi. Ishte shumë i përmbajtur dhe qetësohej sapo e drejta të vihej në vend. Asnjëherë nuk është zemëruar për çështje vetjake.

Nuk hynte në shtëpinë e askujt pa marrë leje. Kur hynte në kuvend apo ambiente publike nuk lejonte që t'i ngriheshin në këmbë. Në orar ishte shumë i përpiktë.

Shpesh shihej i gëzuar, i butë dhe jo i vrazhdë apo i ashpër. Nuk ka qenë zhurmues as qortues i madh, as lavdërues i tepruar. Përgjigjej gjithmonë me “urdhëro”, kujtdo që e thërriste.

Ai bënte shaka me shokët e tij, përzihej me ta dhe bënte gara, luante me fëmijët e tyre dhe i mbante në prehër .

Në jetëshkrimet e shohim Muhamedin (a.s.) edhe si misionar të besimit islam, edhe si burrë shteti, edhe si komandant, edhe si legjislator, edhe si familjar, edhe si shok e mik, edhe si njeri të thjeshtë. Por jeta e tij nuk mund të kuptohet e vështruar vetëm në këto aspekte, sepse në çdo moment të jetës së tij ai drejtohej nga shpallja hyjnore dhe udhëhiqej nga porositë e Allahut xh. sh..

KREU II

PROFETI QË PËRSOSI VIRTYTET NJERËZORE

Figura e Profetit (a.s.) në Kuran

Kurani i madhërishëm zë vendin kryesor, për sa i përket formimit dhe edukimit të personalitetit të çdo muslimani, sepse ai është libri hyjnor që vë bazat e besimit islam, përcakton linjat e botëkuptimit tonë, rrënjës konceptet e çdo njeriu dhe perceptimet që lidhen me Islamin në vijat e tij të përgjithshme dhe të veçanta.

Kurani është libri që orienton bindjet tona shpirtërore dhe praktike në rrugë të drejtë. Ai është drita dhe libri i qartë, nëpërmjet të cilit Zoti i udhëzon ata që ndjekin kënaqësinë e Tij drejt rrugëve të shpëtimit intelektual, shpirtëror dhe praktik; i nxjerr ata nga errësira në dritë; i udhëzon në rrugën e drejtë dhe u sqaron të vërtetën rreth së cilës ka mospajtime. Kurani është udhërrëfyes dhe mëshirues për njerëzit që besojnë; është shërim për sëmundjet e zemrave; është provë dhe argument nga Zoti i botëve; është një libër, të cilit nuk mund t'i afrohet gënjeshtër nga asnjë anë; është dokumenti i mbrojtur, të cilin Zoti e ka ruajtur nga çdo shtrembërim, shtim apo fshirje, siç ka thënë edhe Vetë: *“Sigurisht, Ne e kemi shpallur Kurandin dhe, sigurisht, Ne do ta ruajmë atë”* (El-Hixhr: 9).



Kurani – burimi i parë i jetëshkrimit të Profetit (a.s.)

Kurani konsiderohet si burimi i parë i jetëshkrimit të Profetit Muhamed (a.s.). Ai është libri i Mesazhit Hyjnor që flet rreth personalitetit të Pejgamberit (a.s.) në aspektet e tij të ndryshme: rreth natyrës dhe kapacitetit të tij; rreth moralit, metodave dhe dinamikës së tij në predikimin e Islamit si në jetën e tij private, ashtu edhe në atë publike; rreth botës së tij të brendshme të mendimeve, ndjenjave dhe emocioneve të tij në përballje me sfidat e shumta; rreth marrëdhënieve të tij me besimtarët në kohë paqeje dhe lufte etj.

Me fjalë të tjera, çdo koncept që ka të bëjë me personalitetin profetik të Muhamedit (a.s.) dhe me mishërimin e misionit të tij në jetën praktike, duhet të nisët e të bazohet në Kuran dhe jo në idetë filozofike, të cilat shprehen për profecinë si mision me nocione të përgjithshme, që janë larg frazave të qarta kuranore. Vargjet e Kuranit, me thjeshtësinë e tyre shprehëse, synojnë që njerëzit t'i përvetësojnë sa më lehtë në bagazhin e tyre teorik dhe emocional konceptet mbi Profetin (a.s.) dhe misionin e tij.

Dimensioni profetik i personalitetit të Muhamedit (a.s.) është një çështje hyjnore, e cila nuk mund të njihet, përveçse me anë të asaj që ka shpallur Zoti në Librin e Tij ose në Sunetin (Traditën) e të Dërguarit të Tij. Prandaj, është e domosdoshme që muslimanët ta studiojnë këtë çështje nëpërmjet Kuranit (të cilin Zoti ua ka zbritur njerëzve për ta kuptuar, besuar dhe zbatuar), veçanërisht gjatë periudhës së parë të Shpalljes (në Mekë), ku Profeti (a.s.) jetonte me pasuesit dhe, njëkohësisht, me armiqët e tij. Ishte pikërisht ajo situatë që shkaktonte shumë probleme, ndërlikime dhe dilema në aspektin që Shpallja Hyjnore nisej nga ideja e përgjithshme në nivel teorik drejt zbatimit të saj praktik. Kështu që njerëzit shihnin tek Profeti (a.s.) përmbushjen e thënieve kuranore, mishërimin e ideve që ato përcillnin.

Misioni i të dërguarit:

Kurani flet për këtë çështje në një sërë vargjesh, si:

“O Profet! Ne të kemi dërguar ty si dëshmitar, sjellës të lajmit të mirë dhe paralajmërues; njëkohësisht, (të kemi çuar) si thirrës, që i fton njerëzit në rrugën e Allahut me urdhrin e Tij dhe si pishtar ndriçues.” (El-Ahzâb: 45-46);

“Është Ai që u solli analfabetëve një të Dërguar nga gjiri i tyre, për t’u lexuar atyre shpalljet e Tij, për t’i pastruar e për t’u mësuar Librin dhe Urtësinë, ndonëse ata më parë ishin vërtet në humbje të plotë.” (El-Xhumu’ah: 2);

“Allahu ju ka dërguar udhërrëfyesin: një të Dërguar, i cili ju lexon shpalljet e Allahut me shpjegime të qarta, për t’i çliruar ata që besojnë dhe bëjnë vepra të mira, nga errësira në dritë” (Et-Talâk: 10-11).

Dëshmitar për mbarë bashkësinë njerëzore

Shohim se roli që i jep Profetit Shpallja Hyjnore në sferën njerëzore, është roli i dëshmitarit, ndaj bashkësisë së besimtarëve, nga pozita e udhëheqësit që ua ka përcaktuar shenjat dhe vijat ku duhet të ecin, që i vëzhgon ata në jetën e tyre praktike, në mënyrë që ajo të përputhet me vijën hyjnore. Ky është roli i të Dërguarit që u lexon njerëzve vargjet e Zotit; që u mëson atyre Librin e Tij në aspektin teorik dhe Urtësinë në aspektin praktik; që u jep besimtarëve, lajmin e mirë për Parajsën dhe shpërblimin e madh që i pret; që i paralajmëron ata që nuk besojnë, për dënimin e dhembshëm që i pret në Ferr.

Ai është edukatori që i dëlir ata, duke çliruar zemrat dhe jetën e tyre nga ndotja ideore, nga papastërtitë praktike; duke i nxjerrë ata nga errësira e padijes, mosbesimit, idhujtarisë, humbjes dhe prapambetjes në dritën e dijes, besimit, monoteizmit dhe përparimit.



Vazhdues i shpalljeve hyjnore

Profeti (a.s.) nuk erdhi për të shfuqizuar mesazhet e sjella nga të dërguarit e mëparshëm apo për t'i mohuar ato, por për t'i vërtetuar ato, siç e ka përcaktuar vetë Zoti i Lartësuar *"...kur t'ju vijë një i Dërguar, vërtetues i asaj që ju është dhënë"* (Âl'Imrân: 81). Ai i konfirmonte librat që u ishin zbritur atyre dhe ua shpjegonte ato njerëzve: *"O ithtarët e Librit! Juve ju erdhi i Dërguari Ynë, i cili ju shpjegon gjëra nga ato që i keni fshehur ju prej Librave (Teuratit dhe Ungjillit) dhe ju fal shumë"* (El-Mâ'ide: 15) dhe konfirmonte besimin tek të gjithë të dërguarit: *"Ne nuk bëjmë dallim mes asnjërit prej të dërguarve të Tij"* (El Bekare: 285).

Njerëzit i binden atij përmes forcës së besimit

Vëmë re se Profeti (a.s.), në rolin e tij si njoftues i lajmit të mirë, paralajmërues dhe thirrës në rrugën e Zotit, ushtron forcë mbi njerëzit por i bind ata përmes forcës së besimit, përkushtimit dhe veprave të mira. Zoti i Lartësuar i drejtohet atij: *"Prandaj këshilloji (njerëzit, o Muhamed), se ti je vetëm këshillues dhe nuk je ngarkuar t'i detyrosh ata me forcë!"* (El-Gâshije: 21-22). Po ashtu, Ai thotë:

"Kush i bindet të Dërguarit, i është bindur Allahut. Sa për ata që kthejnë kokën mënjënë, Ne nuk të kemi dërguar (o Muhamed) që të jesh rojtar i tyre." (En-Nisâ' – 80); *"...i Dërguari ka për detyrë vetëm që të shpallë qartazi"* (El-'Ankebût: 18); *"Ne e dimë mirë çfarë thonë ata, por ti nuk do t'i detyrosh ata me dhunë (që të besojnë). Prandaj këshillo në bazë të Kuranit këdo që ka frikë paralajmërimit Tim!"* (Kâf: 45).

Kështu, pra, roli i misionit profetik tregon se Zoti nuk e ka pajisur të Dërguarin e Tij me forcë tjetër mbi atë të zakonshtmen por, që të ketë pushtet për të formësuar mendjet e njerëzve e për t'i udhëzuar ata drejt besimit, përveç forcës së fjalës së mesazhit hyjnor. Madje, mund të thuhet se, për të përballuar

një qëndrim të caktuar, gjithçka që e mëson Zoti të Dërguarin e Tij, që të thotë: *“Unë jam urdhëruar që të adhuroj vetëm Zotin e këtij Qyteti (Mekës), i Cili e ka bërë atë të shenjtë dhe të Cilit i përket gjithçka. Jam urdhëruar që t’i nënshtrohem Atij dhe të këndojs Kuranin. Kushdo që merr rrugën e drejtë, e bën për dobi të vet. Ndërsa atyre që devijojnë, ti thuaju: ‘Unë jam vetëm paralajmërues’.”* (En-Neml: 91-92).

Metoda praktike dhe stili i urtë i thirrjes

Me orientim nga Zoti, Profeti Muhamed (a.s.) e nisi përcjelljen e mesazhit hyjnor nëpërmjet një stili të urtë, që sillej në rrethin e fjalës së butë dhe krijimin e një atmosfere të qetë, duke synuar të hapte horizonte të reja mendimi dhe të prekte thellësitë e ndjenjave.

Mjetet që ai përdorte ishin diskutimi me mënyrën më të mirë dhe kthimi i së keqes me të mirë, sepse çështja ishte që t’i bindte njerëzit për besimin në Zot nëpërmjet rrugës së logjikës dhe asaj të ndjenjave, sepse besimi i arrirë përmes bindjes logjike dhe ekuilibrit të ndjenjave nuk rrëzohet para lëkundjeve psikologjike, shoqërore dhe politike. Ndërsa njerëzit që e adhurojnë Zotin me kusht, nuk mund të jenë të qëndrueshëm para përvojave të vështira.

Aderimi i popullatës në Islam nuk bëhej për shkak të efektit të faktorëve personalë, si dëshira dhe frika, e as për të mbledhur numrin më të madh të mundshëm të njerëzve, pa qenë të pajisur më parë me vetëdijen e brendshme. Profeti (a.s.) synonte largimin e tyre nga shoqëria e idhujtarisë, për t’i kaluar në shoqërinë e Islamit, që të thithin spiritualizmin dhe idetë e tij, që të hapin zemrat e tyre ndaj frymëzimeve të tij dhe të ndjekin linjat e reja. Prandaj, muslimanët përpiqeshin që edhe në kohë lufte me idhujtarët t’i jepnin mbrojtje cilitdo që ua kërkonte atë, me qëllim që atyre t’u jepej shansi për të dëgjuar Fjalën e Zotit me kuptimin e ri që përçonte ajo. Kjo duket qartë në



vargun kuranor: *“Nëse ndonjë nga idhujtarët kërkon mbrojtje nga ti (Muhamed), mbroje, në mënyrë që të dëgjojë fjalën e Allahut, e pastaj përcille në vendin e tij të sigurt. Kështu duhet, sepse ata janë njerëz që nuk dinë.”* (Et-Teube: 6).

Fjala e mirë dhe dialogu

Muhamedi (a.s.) që në fillim të thirrjes së tij krijoi mjedisin e nevojshëm në të cilin arritën të shpalosen lirisht parimet islame dhe të zbatohen drejtësia dhe mirësia e vërtetë njerëzore. Me fjalë të tjera, një mjedis ku njerëzit filluan të jetojnë përvojën e gjallë që u ofron Islami në realitetin e tyre. Kështu, ata do të binden me logjikën e kohës ku jetojnë dhe me forcën e ideve që përcjell Islami përmes predikimit dhe dialogut.

Është pikërisht kjo gjë që i ka bërë terma të tillë, si: *“meditim”, “intelekt”, “argument”, “provë”, “diskutim në mënyrën më të mirë”, “analizën”, “thirrje me urtësi dhe me këshillë të mirë”* etj., terma bazë të thirrjes islame në ligjërimin e saj sepse qëllimi më i madh është që feja të jetë e tëra për Zotin në mendjet e njerëzve.

Në këtë mënyrë, nuk do të mbetet më asgjë që të mos i nënshtrohet logjikës së fesë në mendjet dhe zemrat e tyre, nuk do të lëvizë më asnjë ndjenjë a emocion për dikë tjetër veç Zotit, në dashurinë e tyre shpirtërore. Në jetën e tyre nuk do të ketë më adhurim për dikë tjetër, përveç Zotit në çdo rrethanë.

Është e natyrshme që kjo gjendje të realizohet vetëm nëpërmjet një bindjeje të thellë e të përqendruar tek mendimi, argumenti dhe mënyra më e mirë në përballjen e mendjes, zemrës dhe ndjenjave. Këtë e kanë trajtuar edhe vargjet e mëposhtme:

- *“Thirr në rrugën e Zotit tënd me mençuri dhe këshillë të bukur dhe diskuto me ata në mënyrën më të mirë! Me të vërtetë, Zoti yt i di më së miri ata që janë shmangur nga rruga e Tij, i njeh më së miri ata që janë në rrugë të drejtë.”* (En-Nahl: 125);

“Nëse ata të quajnë gënjeshtar, thuaju: Unë kam (shpërblim për) punën time, kurse ju keni (shpërblim për) punën tuaj. Ju s’jeni përgjegjës për atë që bëj unë dhe as unë s’jam përgjegjës për atë që bëni ju.” (Jûnus: 41);

“Diskutoni me ithtarët e Librit vetëm me mënyrën më të mirë, por jo me keqbërësit midis tyre. Dhe thoni: “Ne besojmë në atë që na është zbritur neve dhe në atë që ju është zbritur juve. Zoti ynë dhe Zoti juaj është një dhe ne Atij i nënshtrohemi si muslimanë”.” (‘Ankebût: 46);

“E kush flet më bukur se ai që i fton njerëzit drejt Allahut, bën vepra të mira dhe thotë: “Unë, me të vërtetë jam musliman.” Nuk barazohet e mira me të keqen! Të keqen ktheje me të mirë e atëherë armiku yt do të të bëhet menjëherë mik i ngushtë.” (Fussilet: 33-34);

“Andaj, ti thirru dhe bëhu këmbëngulës, ashtu siç je urdhëruar, mos i ndiq epshet e tyre dhe thuaj: “Unë besoj çdo libër që e ka shpallur Allahu dhe jam urdhëruar që të gjykoj drejt midis jush; Allahu është Zoti ynë dhe Zoti i juaj. Veprat tona janë për ne, e veprat tuaja janë për ju. Midis nesh dhe jush nuk ka kurrfarë mosmarrëveshjeje. Allahu do të na tubojë të gjithëve dhe tek Ai do të kthehemi të gjithë”.” (Shûra: 15);

- “Ne nuk mund të jemi që të dyja palët në rrugën e drejtë, ose ju, ose ne jemi në humbje të qartë!” (Sebe’: 24);

Kështu, shohim se stili islam i debatit dhe i dialogut nuk niset nga presioni ndaj vetëdijes njerëzore nëpërmjet dhunës dhe ashpërsisë, por niset nga studimi i njeriut në të gjitha aspektet, aspiratat dhe ndjenjat e tij të veçanta në një diagram, i cili thekson metodat e pranuar të fjalës së mirë e të butë, në mënyrë që pala tjetër të jetojë në një qetësi shpirtërore, mendore dhe emocionale gjatë bashkëbisedimit.

Dashuria e Profetit (a.s.) për njerëzit

Profeti (a.s.) përfaqëson majën më të lartë të moralit njerëzor në marrëdhëniet me mjedisin, si në aspektin personal, ashtu



edhe në aspektin shoqëror. Ai kishte një mendje dhe një zemër të hapur për të gjithë njerëzit dhe nuk vuante nga mendjengushtësia, ashpërsia e karakterit dhe gjuha e mprehtë, por ishte, siç e përshkruan Zoti në Kuran:

"Në saje të mëshirës së Allahut, u solle butësisht me ta (o Muhamed). Sikur të ishte i ashpër dhe i vrazhdë, ata do të largoheshin prej teje." (Âl 'Imrân:159); *"... se ti je me virtyte madhore."* (El-Kalem: 4);

"Tashmë, ju ka ardhur një i Dërguar nga gjiri juaj. Atij i vjen rëndë për gjynahet që bëni ju, jua dëshiron të mirën me gjithë zemër që ju të shkoni rrugës së drejtë dhe është i butë e i mëshirshëm me besimtarët." (Et-Teube: 128).

Nga disa vargje të Kuranit të madhërishtëm, na krijohet ideja se Profeti (a.s.) kishte dashuri për njerëzit, për anën e tyre humane, në kuptimin që ua dëshironte atyre të mirën dhe mërziqej nga dyshimi, këmbëngulja e disave që nuk besonin. Nganjëherë këto ndjenja të buta njerëzore rëndoheshin aq shumë, saqë pikëllohej fort. Kjo do të thotë se një gjë e tillë nuk ishte një çështje vetjake, që i ndodh njeriut për shkak të refuzimit që i bëjnë të tjerët, por vinte si pasojë e keqardhjes pse njerëzit nuk përfitonin nga thirrja e tij dhe nuk pranonin diçka që ishte në interes të tyre, siç thuhet në një sërë vargjesh kuranore:

"Mos u pikëllo (o Muhamed) për shkak të tyre dhe mos u ngushto për kurthet e tyre." (En-Neml: 70);

"Ti mos e shqetëso veten deri në shkatërrim për humbjen e tyre! Allahu është vërtet i Gjithëdijshtëm për atë që bëjnë ata." (Fâtir: 8);

"A mos vallë do të vrasësh veten nga pikëllimi, nëse ata nuk besojnë në këtë Fjalë (Kuran)?" (El-Kehf: 6).

Pikërisht kjo është fryma e misionit profetik, të cilën Muhamedi a.s. porositi çdo thirrës islam ta realizojë në moralin e tij, sidomos kur të niset për t'u predikuar njerëzve. Pra, ai duhet t'i dojë njerëzit dhe në aspektin human, të mos pajtohet me mosbesimin apo idhujtarinë që shprehin disa, në mënyrë

që dashuria për njeriun, ta shtyjë atë të shpenzojë të gjitha energjitë e veta, për t'i shpëtuar njerëzit nga mosbesimi dhe paganizmi e për t'i nxjerrë në bregun e shpëtimit, te besimi në Zotin e Vetëm.

Ja pra, sekretet e suksesit të thirrjes së Profetit: përqendrimi i arsyes për mendjen, i zemrës për zemrën dhe i fjalës për fjalën, sepse arsyeja ka fuqi që të sheshojë shumë nga pengesat psikologjike që hyjnë midis thirrësit dhe njerëzve të tjerë.

I afërt me të varfërit dhe nevojtarët

Zoti deshi që i dërguari i Tij të qëndronte afër me besimtarët e varfër, sepse ata përbënin një pjesë të konsiderueshme të popullatës islame; tek ata shprehej natyra e pastër njerëzore e pandotur me papastërtinë e parasë dhe krenarinë e ofiqeve; privilegjet nuk i kishin larguar akoma nga thjeshtësia njerëzore.

Në këtë mënyrë njerëzve, u bëhej e ditur se varfëria nuk është vlerë negative në natyrën njerëzore, por është vetëm një situatë kalimtare dhe që nuk ka lidhje me personalitetin e njeriut.

Po ashtu u bëhej e ditur, se pasuria nuk përfaqëson ndonjë vlerë pozitive në vetvete, madje, zhytja në të dhe largimi nga rruga e drejtë, mund ta shndërrojë pasurinë në vlerë negative. Për këtë arsye, Muhamedi (a.s.) arriti që përmes predikimit të vet të përforconte pozitën e shtresave të dobëta besimtare, të cilat përfaqësonin pikëmbështetjen e thirrjes dhe vullnetarët e mesazhit islam që nuk i frikësoheshin kurrkujt para Zotit. Kështu, besimtari i vërtetë nuk duhet t'i largojë të varfërit dhe nuk duhet t'u kthejë shpinën atyre me pretekstin se të pasurit nuk denjojnë të qëndrojnë me ta për shkak të kryelartësisë së tyre. Kjo është vija e thirrjes së Profetit në rrugën e Zotit dhe e dijetarëve që ecin në këtë rrugë. Kjo është edhe direktiva që jep Zoti me thëniet e Tij:



"Mos i dëbo ata që i luten Zotit të vet në mëngjes e mbrëmje, duke e dëshiruar Fytyrën (mirësinë) e Tij! Ti nuk je aspak përgjegjës për ata e as ata nuk janë përgjegjës për ty. Nëse ti i dëbon ata, atëherë do të jesh keqbërës." (El-En'âm: 52);

"Dhe qëndro me ata që i luten Zotit të vet në mëngjes dhe mbrëmje, duke dëshiruar Fytyrën (kënaqësinë) e Tij dhe mos i shmang sytë nga ata (tek të tjerët), duke dëshiruar stolitë e shkëlqimin e kësaj jete. Mos dëgjo atë zemrën e të cilit ia kemi lënë mospërfillëse ndaj përmendjes Sonë e, që shkon pas dëshirave të veta, duke shkelur çdo kufi në veprimet e veta." (El-Kehf: 28);

Zoti deshi prej Profetit (a.s.) që, në marrëdhëniet e tij me besimtarët të ishte i butë , t'u hapte zemrën, t'u bënte vend në kuvendin e tij, të kthehej nga ata e t'i përshëndeste, siç shprehet vargu i mëposhtëm:

"Kur të vijnë tek ti ata që besojnë në shpalljet Tona, thuaj: "Paqja qoftë mbi ju!". Zoti juaj ia ka bërë detyrim Vetes mëshirën. Nëse dikush nga ju bën ndonjë vepër të keqe pa e ditur, e pastaj pendohet e përmirësohet, ai do ta gjejë Allahun Falës dhe Mëshirues." (El-En'âm).

Toleranca – morali i mesazhit hyjnor

Zoti e donte Profetin e Vet që të praktikonte moralin e tolerancës me të tjerët, por kjo të bëhej jo në kurriz të përmbajtjes së mesazhit, duke i trajtuar problemet me mospërfillje apo duke u bërë lëshime të tjerëve e duke u shmangur nga vija e drejtë, sepse hapja ndaj jobesimtarëve synonte t'i tërhiqte ata drejt vetes. Prandaj, Profeti (a.s.) nuk bënte lëshime në çështjet e fesë për të kënaqur jobesimtarët, sepse ai nuk kishte për qëllim t'i tërhiqte njerëzit drejt personit të tij, por t'i bindte ata në fenë Islame. A mund të bënte lëshime që ishin ndaj vijës së tyre afetare?! Edhe atëherë kur idhujtarët i propozuan Profetit (a.s.) se do ta respektonin Zotin për të

Cilin ai fliste, nëse ai do të respektonte disa nga zotat e tyre dhe ai, i shtyrë nga përkushtimi i tij, për pak sa s'e mori në konsideratë këtë propozim, Zoti i Madhëruar ndërhyri me mbrojtjen e Tij dhe e forcoi Profetin (a.s.). Kurani e tregon kështu këtë ngjarje: *“Ata u përpoqën të të largonin ty (Muhamed) nga ai (Kurani), që të kemi shpallur Ne, me shpresë se ti, duke shpifur, do të Na vishje diçka tjetër përveç tij (Kuranit). Po ta bëje këtë, atëherë, ata do të të merrnin ty për mik. Dhe sikur mos të të kishim forcuar Ne, gati do të kishe anuar pak nga ata dhe atëherë, me të vërtetë, Ne do të bënim që të shijoje dënimin e dyfishtë në këtë botë dhe pas vdekjes; e atëherë, nuk do të gjeje askënd për ndihmës kundër Nesh.”* (El-Isrâ': 73-74).

Pas kësaj ngjarjeje, Profeti (a.s.) gjithnjë i lutej Zotit *“Mos më lër të mbështetem në veten time, qoftë edhe për një çast, sa kapsallitja e syve!”*. Zoti deshi që kjo mbrojtje dhe mbështetje e vazhdueshme të forconin tek Muhamedi (a.s.) frymën profetike në veprimtarinë e tij të përditshme. Kjo bëhej që, përmes saj, ai t'i përballonte situatat e ndryshme me qëndrueshmëri të paepur e kështu t'ua bënte të ditur jobesimtarëve se nuk ka vend për barazi mes rrugës së drejtë dhe asaj të shtrembër, e as për zgjidhje gjysmake në çështjen e mesazhit hyjnor, siç thotë Zoti i Lartësuar:

“Thuaj: “O ju mosbesimtarë! Unë nuk adhuroj çfarë ju adhuronin dhe ju nuk jeni adhurues të Atij që unë adhuroj. Unë nuk do të jem kurrë adhurues i atyre që ju i adhuronin dhe as ju nuk do të jeni adhurues të Atij që unë adhuroj! Ju keni fenë tuaj, ndërsa unë kam fenë time!” (El-Kâfirûn: 1-6);

“Thuaj: “Unë jam urdhëruar që ta adhuroj Allahun me përkushtim të singertë. Unë jam urdhëruar të jem i pari nga ata që i nënshtrohen Atij.” Thuaj: “Unë i trembem dënimin të Ditës së madhe, nëse nuk i bindem Zotit tim”. Thuaj: “Vetëm Allahun e adhuroj me besimin tim të plotë e të singertë, kurse ju adhuronin kë të doni në vend të Tij!” Thuaj: “Të humburit e vërtetë janë



ata që do të humbin veten dhe familjen e tyre në Ditën e Kiametit. Ja, kjo është humbja e qartë!” (Ez-Zumer: 11-15).

Mirësia, kujdesi dhe orientimi i Zotit për Profetin (a.s.)

Zoti i Madhëruar e përfshiu Profetin (a.s.) me të gjithë mirësinë, kujdesin, orientimin dhe mbështetjen e Vet, qoftë përmes fuqive shpirtërore që i kishte falur atij, qoftë përmes Shpalljes Hyjnore që zbriste gradualisht në çdo rrethanë me të cilën ai përballej, në mënyrë që Muhamedi (a.s.) të ishte vazhdimisht i mbrojtur në përcjelljen e mesazhit dhe në çështje të tjera të jetës së tij.

Sipas përshkrimit kuranor, Profeti (a.s.) pikëullohej nga nxitimi i njerëzve drejt mosbesimit, lëndohej nga disa prej fjalëve të tyre dhe ngushtohej nga dredhitë e tyre. Këto ndjenja negative a e kishin bazën në qëndrimin e njerëzve ndaj tij apo lindnin një refuzim i papjekur e i befasishtëm i këtij mesazhi të ri hyjnor, që ishte gjithë vërtetësi, mirësi dhe drejtësi për njerëzit? Apo këto ndjenja ishin pasojë e sfidave të përditshme që jobesimtarët i shtronin Profetit (a.s.), duke i kërkuar që të bënte ndonjë mrekulli a të sillte ndonjë engjëll? Apo ishin pasojë e përgënjeshtërimit, talljes dhe akuzave të rreme që ia drejtonin atij?

Me mirësinë e Tij, Zoti i fliste Profetit (a.s.) për secilën nga këto situata. Kështu, nëse atë e pikëllonte fakti se mosbesimi i tyre do të sillte dëm, përgjigjja hyjnore ishte: *“Ti (o Muhamed) mos u brengos nga ata që nxitojnë në mohim, sepse, në të vërtetë ata nuk mund ta dëmtojnë Allahun aspak.”* (Âl ‘Imrân: 176). Nëse ai mërzohej për shkak të talljeve të tyre, Zoti i thoshte: *“Me të vërtetë, janë përqeshur shumë të dërguar para teje, por ata që përqeshnin i përfshiu ajo me të cilën ata talleshin.”* (El-En‘âm: 10).

Nëse çështja kishte të bënte me përgënjeshtërimit që ata i bënin atij, Kurani thekson: *“Ne e dimë se ty të zemëron ajo që*

thonë ata. Në të vërtetë, nuk je ti ai që po mohojnë ata, por keqbërësit po mohojnë shpalljet e Allahut. Edhe para teje (o Muhamed!), shumë të dërguar janë mohuar, por ata e kanë duruar mohimin dhe lëndimin (që kanë pësuar), derisa u ka ardhur ndihma Jonë, sepse askush nuk mund t'i ndryshojë vendimet e Allahut. Ti tashmë ke dëgjuar për ata të dërguar.” (El-En‘âm: 33-34).

Nëse jobesimtarët i kërkonin Profetit (a.s.) të zbriste nga qielli ndonjë thesar apo engjëll, Zoti i thoshte që ai t’ua bënte të qartë se misioni i tij ishte vetëm paralajmërimi dhe jo sjellja e mrekullive sipas tekave të mohuesve. Sapo mbaronin një kërkesë, ata paraqitnin një të re, pa u ndalur për të dialoguar me seriozitet dhe për të menduar me objektivitet rreth mesazhit të ri hyjnor që u kishte zbritur. Prandaj Zoti i drejtohej Profetit (a.s.) që të mos ngushtohej zemra e tij nga fjalët e tyre, por të duronte: *“Prandaj duro! Durimi yt është vetëm me ndihmën e Allahut. Dhe mos u pikëllo për ta e mos u ngushto për shkak të dredhive të tyre!”* (En-Nahl: 127).

Çështja ishte më e madhe sesa lojërat e idhujtarëve. **Mesazhi kishte ardhur për të ndryshuar të gjithë botën në aspektin e botëkuptimit, punës, marrëdhënieve dhe aspiratave.** Sfidat e madhe ishin procesi i ndryshimit të një situate me të gjitha sfondet e saj politeiste, shtrirjet e saj ateiste dhe devijimet e saj në fushën e moralit dhe vlerave negative.

Qenia e Profetit (a.s.) njerëzor

Kurani i madhërishtëm e ka theksuar qenien e Profetit (a.s.) si njeri, më shumë se çdo element tjetër. Në të njëjtën kohë, ai ka theksuar edhe qenien e profetëve të tjerë njerëzorë, për të kundërshtuar mendimin që e refuzon bashkimin midis qenies profet dhe njerëzor. Zoti deshi që Profeti Muhamed (a.s.) t’ua shpallte këtë njerëzve në ligjërimin e tij kuranor: *“Thuaj: “Unë jam vetëm një vdekatar si ju, që më është shpallur se Zoti juaj*



është një Zot i Vetëm.” (El-Kehf: 110).

Gjithashtu, Zoti deshi që Profeti (a.s.) të hynte më në hollësi në këtë drejtim, me qëllim që të sqaronte kufijtë e fuqisë së vet njerëzore, e cila nuk kishte ndonjë cilësi vetjake që ta ngrinte atë mbi nivelin e njerëzve të tjerë për nga ana e krijimit apo fuqisë fizike, siç thuhet në Kuran: **“Unë nuk ju them se kam thesarin e Allahut apo që e di të padukshmen. As nuk them se unë jam engjëll...”** (Hûd: 31). Ky varg kuranor flet për profetin Nuh (a.s.), por shpreh një model profetik të njëjtë për të gjithë profetët e tjerë.

Arsyeja është se misioni profetik nuk synon këtë gjë, pra, që të krijojë njerëz me fuqi të mbinatyrshme. Prandaj dhe Profeti Muhamed (a.s.) i tha të njëjtën gjë popullit të tij: **“Thuaj: Unë nuk ju them se zotëroj thesaret e Allahut apo se e di të padukshmen dhe as nuk them se jam engjëll. Unë ndjek vetëm atë që më shpallet”** (El-En’âm: 50).

Prej këtyre vargjeve, kuptojmë se Profeti Muhamed (a.s.) ndiqte vetëm atë që i shpallej nga Zoti dhe ua shpjegonte atë njerëzve. Edhe nëse Zoti i mësonte atij diçka nga e padukshmja, i jepte pikërisht atë që ai duhej Profetit (a.s.) në kryerjen e misionin të vet, në mënyrë që tek ai të plotësojë aspektin e diturisë hyjnore në lidhje me nevojat praktike dhe intelektuale.

Kjo ide zgjerohet edhe më tej në përshkrimin që Kurani i bën figurës njerëzore të Profetit (a.s.), kur Zoti i thotë atij:

“Thuaj: Unë nuk mund t’i sjell vetes as dobi, as dëm, përveçse atë që dëshiron Allahu. Sikur ta dija të padukshmen, do t’i shumoja të mirat dhe nuk do të më prekte asnjë e keqe. Unë jam vetëm paralajmërues dhe sjellës i lajmeve të mira për njerëzit që besojnë” (El-A’râf: 188).

Ky varg e bën të qartë se fuqia njerëzore tek Profeti (a.s.) nuk përmban asnjë element të mbinatyrshëm për të mbrojtur veten, përveçse nëpërmjet ligjësive të përgjithshme që Zoti ka vendosur në botë ose përmes mbështetjes dhe mbrojtjes hyjnore, që Zoti i jepte Profetit (a.s.) në çaste të caktuara.

Marrëdhënia e muslimanëve me të Dërguarin e Zotit

Kurani ua bën të qartë muslimanëve marrëdhënien e tyre me të Dërguarin e Zotit. Pikësëpari, është marrëdhënie besimi tek ai si i dërguar dhe që varet nga afërsia e tyre me mesazhin hyjnor të përcjellë nga ai. Pra, është në marrëdhënie midis ndjekësve të mesazhit me sjellësin e tij. Këtë gjë e ka shprehur Kurani i madhërishëm në vargun:

“Muhamedi nuk është babai i askujt prej burrave tuaj, por është i Dërguari i Allahut dhe vula e profetëve” (El-Ahzâb: 40). Pra, duhet që figura e Muhamedit (a.s.) në vetëdijen, logjikën dhe ndjenjën fetare të muslimanit të jetë figura e “të Dërguarit të Zotit”, në mënyrë që ai të ndërgjegjësohet përmes mesazhit të tij gjë që forcon lidhjen me Profetin (a.s.) dhe jo largimin nga Ai.

Disa popuj afrohen pas një ideje për shkak të lidhjes që kanë me mbartësin e kësaj ideje dhe, kur ai e ndërron mendimin e tij, atëherë edhe ata e ndjekin atë sipas mendimit të ri, pa u munduar të dallojnë vërtetësinë e mendimit të parë apo të dytë. Kështu pra, çështja tek ata është përkushtimi ndaj personit dhe jo idesë, larg çdo objektiviteti.

Epiteti **“vula e profetëve”** do të thotë se Islami është mesazhi i fundit dhe se misioni profetik i Muhamedit (a.s.) është misioni përmbyllës, pas të cilit nuk ka më profeci.

Prandaj pasimi i mesazhit islam dhe i përcjellësit të tij është pasim i përjetshëm, që nuk mund të ndërpritet nga zhvillimi dhe nuk mund të zhduket me kalimin e kohës, por mbetet për të ripërtërirë kuptimin e thellë të tij, sepse ky mesazh përmban në vetvete elementet e gjalla që e pasurojnë njeriun në përvojën e tij të tashme e të ardhshme, ashtu siç e pasuruan atë në përvojën e tij të kaluar; sepse ai është bir i të gjitha kohërave, realitet i gjallë dhe jo bir i një kohe të caktuar.

Urdhërues në të mira e ndalues në të këqija

Kurani flet për figurën e Profetit Muhamed (a.s.) dhe përmendjen që i bënë atij librat qiellorë, si Teurati dhe Ungjilli:



“...dhe atyre që ndjekin të Dërguarin Tonë..., të cilin ata do ta gjejnë të shënuar në shkrimet e tyre, në Teurat dhe Ungjill. Ai do t'i urdhërojë ata të bëjnë vepra të mira dhe do t'i ndalojë nga të këqijat; do t'ua lejojë të mirat e do t'ua ndalojë të këqijat, duke i liruar nga barrët e rënda dhe vështirësitë që kanë pasur” (El-A'râf: 157).

Këtu e njohim sërish Profetin (a.s.) nëpërmjet simboleve madhore të mesazhit të tij, i cili përmban urdhërin për përqafimin e së mirës dhe ndalimin e së keqes; lejimin e gjërave të dobishme në vetvete për njerëzit dhe ndalimin e gjithçkaje të dëmshme për ata dhe që është e keqe në vetvete; heqjen e barrëve historike dhe të vargonjve me të cilat ishin ngatërruar. Kështu, ai është i Dërguari, të cilin Zoti e ka çuar për t'u ofruar jetës dhe njerëzve çdo gjë që e ngre nivelin e tyre, që ua forcon pozitat dhe i përmirëson ata.

Në një përshkrim tjetër kuranor, thuhet:

“Tashmë ju ka ardhur një i Dërguar nga gjiri juaj. Atij i vjen rëndë për gjynahet që bëni ju, jua dëshiron të mirën me gjithë zemër që ju të shkoni rrugës së drejtë dhe është i butë e i mëshirshëm me besimtarët” (Et-Teube: 128).

Pra, Muhamedi (a.s.) ishte i Dërguari i ardhur nga gjiri i bashkësisë, ai që hapi zemrën e tij për të gjitha dhimbjet, problemet dhe hallet e jetës. Prandaj ai lodhej dhe i vinte rëndë për gjithçka që e lodhte dhe e rëndonte bashkësinë në jetën e saj dhe kujdesej për atë njëlloj si kujdesej për veten apo familjen e vet. Ai përpiqej të largonte prej saj çdo të keqe dhe ta shtynte atë drejt çdo të mire, ishte i butë me besimtarët dhe i mëshironte ata, gjë që e shprehte me mendimin, ndjenjat dhe sjelljet e tij. Ai marshonte përkrah njerëzve në çështjet publike dhe private. Ky është shembulli ideal i udhëheqjes dhe ndërveprimit në shoqërinë njerëzore në botën e ndjenjave, mendimet dhe sjelljes, duke u nisur nga mëshira e hapur nga çdo aspekt i jetës.

Zoti porositi në Kuran: *“Dhe Ne nuk të kemi dërguar ty (o Muhamed), veçse si mëshirë për botët.”* (El-Enbijâ': 107). Ai me cilësitë e tij shpirtërore ishte mëshirë për njerëzit, që vepronin e

gjallonin përmes dashurisë, butësisë, kujdesit dhe orientimit të tij për ta, dhe në mesazhit të tij, që mishëronte mëshirën dhe mirësinë duke ia përçuar njerëzimit në jetën reale.

Ai dhe njerëzit që e rrethojnë, i përkulen dhe i përulen Zotit me adhurim e përgjërëm, duke kërkuar faljen dhe kënaqësinë e Tij. Në fytyrat e tyre duken shenjat e adhurimit, nga përuljet e shumta që ia kushtojnë Zotit të tyre. Këtë shembull Kurani e krahason me një farë të mbjellë që lëshon filiza, forcohet e pastaj ngrihet e fortë me kërcellin e vet, duke gëzuar mbjellësin. Fara simbolizon fenë islame, rritja e së cilës në fuqi dhe në numër, sigurisht që i mrekullon shikuesit. Ndërsa mbjellësit simbolizojnë Profetin Muhamed (a.s.) dhe shokët e tij, që bënë përpjekjet më të mëdha për rritjen dhe përhapjen e kësaj feje. Kjo është shoqëria e përsosur në bashkëveprimin midis udhëheqësit dhe bazës, për të arritur forcën shpirtërore e praktike tek njeriu dhe jeta.

Metoda e Profetit (a.s.) në përballimin e sfidave

Profeti Muhamed (a.s.) përballoi sfidat më të ashpra nga ana e jobesimtarëve dhe idhujtarëve. Ata e sulmuan atë me të gjitha akuzat që, në sytë e njerëzve, ia dobësonin pozitën e tij si i Dërguar. Kështu, në fillim e quajtën poet që kishte sjellë një stil të ri në poezi, çka e ngrinte atë mbi poetët e kohës, të cilët nuk zotëronin ndonjë pozitë të shenjtëruar në shoqërinë e tyre, sepse poetika nuk të bënte njeri udhëheqës. Pastaj e quajtën fallxhor që i tërhiqte zemrat e njerëzve me anë të magjisë. Më pas, akuzat u përshkallëzuan edhe më keq, duke i thënë se trillonte gënjeshtër për Allahun, kur thoshte se ishte i dërguar. Pastaj akuzat vajtën edhe më tej, duke e quajtur mesazhin profetik: *“përralla të popujve të lashtë; të cilat i ka vënë t’i shkruhen e t’i lexohen atij në mëngjes e mbrëmje”* (El-Furkân: 5). Gjithashtu, i thanë: *“Atë e mëson një njeri”* (En-Nahl: 103).

Zoti iu kundërpërgjigj këtyre akuzave në shumë vargje kuranore:



“Ky (Kuran) është vërtet fjalë e (kumtuar prej) një të Dërguari të nderuar (Muhamedit a.s.) e nuk është fjalë poeti; sa pak që besoni! Nuk është as fjalë e ndonjë falltari; sa pak që po reflektoni! Ai është shpallje e zbritur nga Zoti i botëve!” (El-Hâkka: 40-43);

“Nëse ata thonë: “Ai (Muhamedi) e ka trilluar atë (Kuranin)”, thuaju: Atëherë, sillni një sure të ngjashme me të dhe thirrni (në ndihmë) kë të mundni, përveç Allahut, nëse thoni të vërtetën” (Jûnus: 38);

“Ne e dimë mirë që ata thonë: “Atë e mëson një njeri”! Por ai për të cilin flasin, flet në gjuhën e të huajve, kurse ky (Kurani) është në gjuhën e qartë arabe”. (En-Nahl: 103);

- “Thuaj (o Muhamed): Unë ju këshilloj vetëm një gjë: ngrihuni sinqerisht për Allahun, dy nga dy ose një nga një, e pastaj gjykoni për shokun tuaj (Muhamedin)..”. (Sebe’: 46).

Vëmë re se ligjërimi kuranor nuk niset me stilin e refuzimit të menjëhershëm, por me stilin e përcaktimit të mënyrës së të menduarit. Nëse jobesimtarët e akuzojnë Muhamedin (a.s.), atëherë Kurani i fton ata të shkëputen nga turma, në të cilën njeriu humb personalitetin e tij të pavarur në mendim, veçanërisht kur atmosfera është e rënduar nga urrejtja, armiqësia dhe emocionet. Pastaj i fton ata të ngrihen sinqerisht për Zotin, në mënyrë individuale apo në grup, me qëllim që të vijnë në vete e të arsyetojnë, duke shfrytëzuar atmosferën e qetësisë mendore dhe analizës objektive.

Kështu, le të studiojnë fjalët e Muhamedit (a.s.), veprimet dhe marrëdhëniet e tij me njerëzit e me jetën. Pasi të bëjnë këtë, do të kuptojnë se njeriu i tyre ka ardhur për t’i paralajmëruar njerëzit për dënimin e ashpër të Zotit, nëse ata nuk ndjekin vijën e drejtë të mesazhit të tij.

Kjo është metoda që përfaqëson rrugën kuranore në përballjen me tjetrin edhe në një situatë qëndrimi agresiv kundër vetë Profetit (a.s.), i cili, nuk reagoi me ashpërsi dhe as me nervozizëm, por me gjakftohtësi, urtësi dhe mençuri.

KREU III

PROFETI (a.s.) NË OPTIKËN E PERSONALITETEVE BOTËRORE

Kanë ekzistuar prirje të shumta dhe janë bërë përpjekje të vazhdueshme për të zbuluar të vërtetën mbi vlerat dhe rolin që luajti Profeti Muhamed (a.s.) në historinë e njerëzimit. Por e gjithë literatura e hershme dhe e mëvonshme e botuar rreth besimit islam në përfundim, është deri diku sipërfaqësore dhe e pabazuar në fakte e argumente shkencore të mjaftueshme, megjithëse evropianët patën mundësi të kontaktonin me vlerat e botës islame që herët.

Por disa studiues e, sidomos të rikthyerit nga vendet muslimane sollën në Europë një frymë të re, që ndikoi në evoluimin e mendimit evropian për islamin dhe Profetin Muhamed (a.s.), çka bëri që popujt e tyre të shihnin më mirë shkëlqimin e qytetërimit islam.

Dijetarët, shkrimtarët, politikanët dhe shumë personalitete perëndimore, që objektivisht kanë dhënë vlerësimet e tyre për personalitetin e Profetit (a.s.), duhen përshëndetur dhe lexuar me vëmendje, sepse me këto vlerësime janë nisur nga qëllimi i drejtë për t'i dhënë njerëzimit modelin e njeriut të përkryer.

Bernard Shou¹ në librin e tij për Muhamedin (a.s.) thotë: "Gjithnjë e kam çmuar lart besimin e Muhamedit, thjesht për shkak të vitalitetit të tij të jashtëzakonshëm. Mendimi im është

¹ Bernard Show, The Genuine Islam, Vol. 1, nr. 8, 1936.



se islami është besimi i vetëm i aftë që të drejtojë me sukses ndryshimet e shumta të jetës.

Jam i bindur se, një njeri i ngjashëm me të, po të merrej me problemet e kohës moderne, do t'i kishte zgjidhur ato me sukses, duke i sjellë njerëzimit paqen dhe lumturinë e nevojshme. Kam parashikuar se besimi i Muhamedit (a.s.) do të jetë i pranueshëm në Europën e nesërme, ashtu siç ka filluar të bëhet i pranueshëm për Europën e sotme".

Napoleon Bonaparti² thotë: "Musai (Moisiu) ia ka shpallur fenë e Zotit popullit të vet, Isai (Jezusi)- botës romake, kurse Muhamedi (a.s.)- tërë botës. Arabia ishte vend pagan. Gjashtë shekuj pas Isait, Muhamedi e njohu botën me besimin në një Zot të vetëm, që është Zoti i Ibrahimit, i Musait, dhe i Isait".

Orientalisti dhe historiani i njohur anglez, **Thomas W. Arnold**, thekson: "Është e vërtetë se Muhamedi (a.s.) ka qenë entuziast dhe ka pasur dashuri dhe flakërim të zjarrtë fetar. Ai këtë kualitet të shkëlqyeshëm e ka përcjellë tek shumë ithtarë të vet... S'mund të hiqet nga mendja se Haxhi është lidhja e Muhamedit (a.s.) me Ibrahimin, besimin e të cilit ky e rimëkëmbi. Nuk ka mendjemprehtësi më gjeniale të ndonjë gjeniu fetar, që të ketë menduar mjetin më të qëlluar për sensibilizimin e shpirtit të besimtarëve dhe t'i japë domethënie kaq të lartë jetesës dhe vëllazërisë së përbashkët, sesa lidhjet me anë të kësaj feje".

Ndërsa orientalistja e shquar italiane **dr. Laura Veccia Vaglieri**³ shpreh këto vlerësime: "Pejgamberi arab, i frymëzuar dhe i lidhur fort me krijuesin e vet, u ka predikuar monoteizmin më të pastër adhuruesve të fetishizmit, ithtarëve të krishterimit dhe judaizmit. Ai doli në konflikt të hapur me

² Bonaparte et Islam, Paris, 1914, fq. 125.

³ Ajni Sinani, Të tjerët për Islamin, Prishtinë 2005, fq. 145.

tendencat e atëhershme të prapambetura të njerëzve, që shpinin në politeizëm. Në predikimet e tij, për t'i bindur njerëzit me besimin në një Zot të vetëm, ai nuk shfrytëzon fenomene të ndryshme natyrore për të mashtruar njerëzit, duke i quajtur ato si mrekulli të tij.

Ai i ka ftuar njerëzit me dashamirësi, jo të braktisin bindjet e tyre, por të meditojnë mbi universin dhe ligjet e tij. Bindja e tij e palëkundur në një Zot, në një të Vetëm dhe të Domosdoshëm, bënte që ai vazhdimisht t'u ofronte njerëzve të lexonin librin e jetës."

Orientalisti francez, **E. Demerngen**⁴, ka shkruar veprën "Biografia e Muhamedit" dhe "Muhamedi dhe sunneti"; prej të cilave po shkëpusim pasazhin e mëposhtëm: "Muhamedi (a.s.) veten e konsideronte si instrument për komunikimin e Shpalljes. Përpjekja e Muhamedit (a.s.) këmbëngulte në atë që të jetë i besueshëm, dëgjues dhe regjistruar besnik, përcjellës i pagabueshëm i asaj që dëgjonte nga fuqia ndriçuese dhe zëri i heshtur i fjalës së amshuar, i fjalës së Allahut, e cila është ajka e Librit. Fjalë të cilën e ruajtën engjëjt fisnikë në qiellin e shtatë. Çdo Pejgamber duhet të ketë argument për mesazhin e tij. Secili duhet të ketë një mrekulli me të cilën të sfidojë të tjerët... Kurani është mrekullia e vetme e Muhamedit (a.s.). Stili i tij është i mrekullueshëm, fuqia e tij mahnitëse vazhdon edhe në ditët tona. Ai ngacmon lexuesin, edhe nëse ai nuk është prej adhuruesve të devotshëm."

Në librin "Vizioni për besimin islam", 1851, të **dr. Selwyn Gurney**, theksohet se: "Muhamedi (a.s.) ka sjellur fenë të cilën e pasojnë miliona njerëz. Që nga fillimi, ndikimi i kësaj feje është gjithnjë në rritje. Tiranët që i besojnë vetëm forcës dhe mbështeten vetëm tek ajo, nuk janë në gjendje të ndikojnë në gjeneratat e mëvonshme, ndikimi i tyre ndihet vetëm gjatë jetës

⁴ Ajni Sinani, vepër e cituar, fq 149.



së tyre. Ne, ndërkaq, pas vdekjes së Muhamedit (a.s.), shohim se ndikimi i tij nuk dobësohet.”

Johan Volfang von Goethe (Gëte)⁵ thotë për Muhamedin a.s.: “Njeri i shkëlqyer, drita e Zotit, u përpoq që atë dritë ta përhapte në botë... Në histori kërkoja shembullin e një njeriu të shkëlqyer dhe atë e gjeta te Pejgamberi arab.”

Ahmet Suse⁶ thekson: “Cili synim është më fisnik dhe më i afërt për njerëzimin, sesa feja e Zotit dhe synimi i Pejgamberit për njësimin e zemrave dhe triumfin e së vërtetës? Le të përfytyrojmë Muhamedin (a.s.) duke u diktuar ithtarëve të Librit shpalljen e Allahut: *“Thuaj: O ithtarë të Librit, ejani të biem në një fjalë të përbashkët edhe për ne edhe për ju, që të mos adhurojmë tjetër përveç Allahut dhe asgjësend të mos bëjmë shok dhe të mos e trajtojmë njëri-tjetrin si zot në vend të Allahut. E nëse ata kthejnë kryet anash thonë: “Dëshmoni se njëmend jemi muslimanë”* (Ali Imran. 64). Muhamedi (a.s.) ishte shembull për jetën e njerëzore, me jetën e tij, të besuarit e sinqertë, të thellë dhe të fuqishëm. Ai është shembull i përkryer për ruajtjen e amanetit dhe udhëzimit. Sakrificat për përhapjen e misionit të tij hyjnor janë argumenti më i fuqishëm, që dëshmojnë mbi përsosmërinë e qenies, qëllimin fisnik, madhështinë e personalitetit dhe shenjtërinë e pejgamberisë së tij.

Michael H. Hart⁷, autor i librit “100 personalitetet më të shquara në histori”, e vendos Profetin në vendin e parë dhe thekson: “Vendimi për t’i dhënë Muhamedit vendin e parë në këtë libër me personalitetet më të shquara të historisë, mund

⁵ Gëte- Mendimet e njerëzve eminentë botërorë për Muhamedin (a.s.), Dituria Islame, Prishtinë 1991, nr. 25, fq 24.

⁶ Ajni Sinani, vepër e cituar, fq. 167.

⁷ Michael H. Hart, 100 personalitetet më të shquara në histori, botim 2001, fq. 7.

t'u duket i papritur disa lexuesve, ndërsa disa të tjerëve mund t'u zgjojë dyshimin, nëse ky është i vetmi njeri në histori që ka arritur suksese të jashtëzakonshme si në zhvillimin e fesë së tij, ashtu edhe në ata të nivelit qytetar.

Nga një prejardhje e thjeshtë, Muhamedi arriti të krijojë dhe të përhapë një nga fetë më të mëdha në botë dhe të bëhet një udhëheqës politik me një efikasitet të jashtëzakonshëm. Sot, katërmbëdhjetë shekuj pas vdekjes, ende është shumë i fuqishëm ndikimi i veprimtarisë së tij fetare.

Princi **Otto Von Bismark**⁸, politikan dhe burrë i madh shteti, themelues i Gjermanisë, ka thënë: "Muhamedi (a.s.) është personalitet i jashtëzakonshëm. Jo rastësisht, Zoti nuk nxori ndonjë tjetër në skenën e ngjarjeve botërore. Muhamed, më vjen keq që s'isha bashkëkohësi yt. Ai është libër hyjnor. Të mohosh burimin e tij, është aq qesharake, sa edhe të pretendosh pasaktësinë e shkencave ekzakte. Njerëzimi, vetëm një herë ka parë një figurë të tillë unike, siç ishte ti dhe më s'do të ketë rastin të shohë".

Edward Gibbon⁹, një historian gjenial, në veprën e njohur "Historia dhe rënia e Perandorisë Romake" vë në dukje: "Muhamedi (a.s.) kishte memorie të shkëlqyer, sjellje humane, gjykim të drejtë dhe qëndrim të vendosur. Ishte i guximshëm në ide dhe aksione. Shpallja e parë të cilën e pranoi nga Zoti, la vulë të thellë tek ai deri në fund të jetës."

Majori A. G. Leonard, në librin¹⁰ e tij shkruan: "Lexuesi duhet të kuptojë menjëherë se Muhamedi (a.s.) nuk ka pasur një frymëzim shpirtëror të zakonshëm, nuk ishte një prijës i thjeshtë

⁸ Ajni Sinani, vepër e cituar, fq. 127.

⁹ Ajni Sinani, vepër e cituar, fq. 130.

¹⁰ Islam, His moral and spiritual value, fq. 20-21.



apo, më tepër, një endacak, por ka qenë një nga mendimtarët më të mëdhenj të të gjitha kohërave dhe epokave. Ishte një njeri me qëllime të sinqerta dhe serioze, ishte jo vetëm i madh, por më i madhi ndër më të mëdhenjtë. Ishte njeri që njerëzimi nuk e kish njohur kurrë më parë. Qe madhështor jo vetëm si Pejgamber, por edhe si trim dhe burrë shteti. Qe frymëzuesi shpirtëror, që krijoi popullin më të madh, shtetin më të madh dhe, për më tepër, fenë më të madhe; Ai ishte modest me njerëzit dhe tepër i përlulur i përkushtuar ndaj Zotit. Lexuesi duhet ta kuptojë se islami ka domethënie të thellë dhe synon t'i nxjerrë ithtarët e vet nga terri i errësirës njerëzore drejt sferave më të larta të Dritës së të Vërtetës."

Lordi Hidhu¹¹ është një shkrimtar dhe intelektual anglez, që ka studiuar jetën e Muhamedit (a.s.) dhe që ka pranuar besimin islam. Midis të tjerash, ai thotë: "Profeti arab, Muhamedi (a.s.), ka pasur një personalitet të jashtëzakonshëm, karakter të fortë dhe një burrëri të tillë që u pasqyrua në çdo hap të jetës së tij, duke bërë të qartë se në botë nuk ka si ai. Nëse do të ndjenim nevojën për të pasur një shembull që do ta udhëhiqte jetën tonë, atëherë, unë me bindje do të shpreheshja: Muhamedi (a.s.) e lartëson jetën e njerëzve, pasi jeta e tij është si një pasqyrë që reflekton në mendje kthjelltësinë, bujarinë, burrërinë, guximin, durimin, krenarinë, faljen e gabimeve, modestinë dhe të gjitha sjelljet e shkëlqyeshme, që pajisin njeriun me virtytet më të larta e më të shkëlqyera. Nuk do të lë pa përmendur se Pejgamberi ka qenë plotësisht i bindur ndaj së vërtetës, lutej më tepër se të tjerët, falej natën derisa i ënjteshin këmbët."

R. V. C. Bodley¹² thotë: "Veçantia e paraqitjes së Muhamedit (a.s.) në historinë e religjioneve, qëndron në atë se ai qe i frymëzuar

¹¹ Lord Hidhu, Dr. Muhammed A. Jemani, në veprën "Edukoni fëmijët tuaj me dashuri për Profetin Muhammed (a.s.)" - Shkodër 1996, fq. 94-95.

¹² "The Messenger", Londër, 1946 f. 338.

për çdo gjë dhe nuk ishte (emëroi veten) as i shenjtë dhe as engjëll. Ai kishte cilësi që ishin krejtësisht njerëzore. Përveç personalitetit të tij të madh njerëzor, ai s'kishte asgjë që e veçonte nga muslimanët e tjerë."

Dr. Nadhmi Luka¹³ thotë: "Muhamedi (a.s.), me virtytet dhe cilësitë e tij nuk ishte si të tjerët. Tek ai qenë tubuar të gjitha shenjat e peygamberëve dhe guximi i guximtarëve, prandaj është detyrë për çdo studiues objektiv që të shprehë respekt ndaj një figure të tillë shembullore dhe të shprehë konsideratë ndaj tij.

Ai ishte njeriu i vetëm i cili qe gjuha e qiellit, sipër tij qëndronte vetëm Zoti dhe askush tjetër, nën të ishin besimtarët dhe adhuruesit e Zotit... Dhe përkundër kësaj, ai asnjëherë nuk tregoi mendjemadhësi.

Këtij Pejgamberi, të cilit i ishte dhuruar udhëzimi i njerëzve, këtij Pejgamberi që ka arritur madhësinë, lartësimin dhe pushtetin, edhe sikur të mburrej me të gjitha këto, nuk do t'i merrej për të keq." Ndërkaq, krahas kësaj shton: "*Mos më madhëroni mua ashtu sikurse madhërojnë të krishterët të birin e Merjemes. Me të vërtetë, unë jam rob i Allahut dhe i Dërguari i Tij*". Një herë, kur doli para një grupi besimtarësh, ata u ngritën në këmbë, duke e madhëruar atë, por ai e ndaloi një gjë të tillë, duke thënë: "*Mos u ngrini në këmbë sikurse fëmijët*."

Cili njeri meriton që biografia e tij të jetë larg çdo paragjykimi, ashtu siç meriton ky Pejgamber, i cili miliona njerëz i shndërroi nga adhurimi shkatërrues ndaj idhujve, në adhurues të Zotit, Krijuesit të gjithësisë? Vetëm ai i largoi nga humbja dhe devijimi dhe i ngriti në lartësinë e besimit. Nga lufta që bëri, nuk përfitoi asgjë, as ai, as familja e tij, siç ndodh me përfituesit e luftës së kësaj bote."

¹³ Dijetar i besimit të krishterë nga Egjipti.



James H. Hart dhe James A. Michener¹⁴ thonë: “Në çdo gjë Muhamedi (a.s.) qe thellësisht racional. Kur vdiq i biri i tij i dashur, Ibrahim, ndodhi eklipsi i diellit dhe populli filloi të thotë se me këtë Zoti po shpreh pikëllim. Sapo dëgjoi këto fjalë, Muhamedi (a.s.) tha: *“Zënia e diellit dhe e hënës janë ndodhi natyrore që nuk kanë asnjë lidhje me lindjen apo vdekjen e njeriut.”* Kur ndërroi jetë Muhamedi (a.s.), pati përpjekje për ta hyznizuar, por pasardhësi i tij dhe shoku i tij më besnik, Ebu Bekër Es-Sidiku, e ndaloi këtë përpjekje dhe në njërin prej fjalimeve të tij theksoi: *“Nëse mes jush ka nga ata që e adhurojnë Muhamedin (a.s.), le ta dinë se ai ka vdekur. Ndërsa ata që adhurojnë Allahun, duhet të dinë se ai jeton gjithmonë.”*

John Davenport, në librin e tij “An Apology for Mohammad and the Koran” fq. 52-53, thotë: “Si mik, si prind ai shfaqte ndjesitë më të buta që fal natyra, por, meqë zemra e tij ishte e mbushur me ndjenja të bukura e fisnike dhe meqë ai ishte i ngarkuar të përmbushte shumë detyra sociale, krahas atyre të vendit, ai nuk e turpëroi titullin e tij si apostull i Zotit. Ai i realizoi funksionet e tij me thjeshtësi të natyrshme për një mendje të lartë. Ai bëri shërbime nga më modestet; thjeshtësia e tyre nuk kishte nevojë për ligjërim. Edhe kur u bë i pari i Arabisë, ai vazhdonte të arnonte këpucët dhe rrobat prej leshi, milte delet, pastronte shtëpinë dhe ndizte zjarrin. Hurmat dhe uji ishin ushqimi i tij i zakonshëm. Kurse qumështi dhe mjalti luksi i tij. Kur udhëtonte, ndante kafshatën e gojës me shërbyesit. Singeriteti dhe bamirësia e tij u dukën kur ai vdiq dhe arkën e familjes së tij e kish lënë të zbrazur.”

Washington Irving, në librin¹⁵ e tij shkruan: “Në të ngrënë ishte i përkorë dhe respektonte rreptësisht agjërimin. Ai nuk

¹⁴ James H. Hart, James A. Michener, Pamflet: Ç’thonë të tjerët për Muhamedin (a.s.), Dituria Islame, Prishtinë, prill 1991, nr. 24, fq. 16.

¹⁵ Mohammed and his succesory, London 1909, fq. 192, 193, 199.

kënaqej me veshje madhështore, me demonstrime njerëzish mendjengushtë; thjeshtësia e tij në veshje nuk ishte e shtirur por rezultat i një shpërfilljeje për gjërat e parëndësishme.

Në sjelljen e tij ai ishte i drejtë. Miqtë dhe të huajt, të varfrit dhe të pasurit, të fuqishmit dhe të dobët i trajtonte barabar, ndaj njerëzit e zakonshëm e donin për dashamirësinë me të cilën i priste dhe dëgjonte ankesat e tyre...

Ngadhënjimi i tij ushtarak nuk zgjoi tek ai as mburrje e as kotësinë e fitores, siç do të kishte ndodhur, po të ishte bërë për qëllime egoiste. Në kohën kur ishte në kulmin e fuqisë së vet, ai ruajti të njëjtën thjeshtësi në sjellje e paraqitje si edhe në ditët e zakonshme. Kaq larg rrinte nga madhështia mbretërore, sa, kur hynte në dhomë e ndiente veten ngushtë, po t'i bëheshin respekte të pazakonta."

Thomas Carlye¹⁶ thekson: "Familja e tij ishte nga më kursimtare, ushqimi i tyre i përbashkët ishte buka prej elbi dhe uji, nganjëherë në vatrat e tyre nuk ndizej zjarri. Familja thoshte me krenari se si ai i ndreqte vetë këpucët, armonte vetë xhakët e tij. Njerëzia nuk i ishte bindur asnjë perandori me gjithë diademat e tyre, si këtij njeriu me rroba të arnuara me dorën e vet. Gjatë njëzet e tre vjetëve përpjekjesh vërtet të mundimshme, unë gjeta te ai një hero të vërtetë, kaq të nevojshëm për veten time."

Bosworth Smith, në librin¹⁷ e tij shkruan: "Në personin e tij ishin bashkuar Qezari dhe Papa; por ai ishte Papa pa pretendimet e Papës dhe Qezar pa legjionet e Qezarit. Ai ishte pa ushtri të rregullt, pa roje vetjake, pa pallat, pa rrogë. Nëse ka ndonjë njeri që meriton të thotë se ka sunduar me të drejtën hyjnore, atëherë ky njeri është Muhamedi, sepse kishte gjithë pushtetin, edhe pse pa mjete e pa mbështetje.

¹⁶ On heroes, Hero-worship and the heroic in histori, fq. 62.

¹⁷ Mohammad and Mohammadaism, fq. 92.



Ai u ngrit mbi titujt e ceremonitë, mbi vogëlimat solemne dhe përrulësinë mburravece të etikës oborrtare. Për mbretërit trashëgimtarë, për princërit e lindur në familje mbretërore, shkëlqimi dhe ceremonitë solemne janë aq të natyrshme sa vetë ajri që thithin. Por edhe ata që njihen më shumë, madje sundimtarët që kanë çarë vetë rrugën, ata që kanë hyrë në analet e historisë, një Qezar, një Kromuell, një Napoleon nuk kanë qenë në gjendje t'i rezistonin joshjes së xhinglave. Muhamedi ishte i kënaqur me realitetin; ai nuk kujdesej për petkun e pushtetit. Kjo thjeshtësi e jetës së tij private ishte në harmoni me jetën e tij publike. *"Zoti - thotë El Buhari, - ia ofroi çelësat e thesarit të kësaj bote, por ai nuk pranoi."*

Leksikologu **Dr.Steinges**¹⁸ thotë: "Drejtësia e Muhamedit (a.s), veprimet dhe vendosmëria e tij për të gjetur të vërtetën, këmbëngulja e vazhdueshme për t'i komunikuar urdhrat hyjnorë, besimi i tij i paluhatshëm në çdo situatë, aftësia për t'i bërë që të dëgjojnë të vërtetën e amshueshme edhe ata që nuk donin ta dëgjonin, të gjitha këto janë argumente bindëse dhe të pamohueshme se ky Pejgamber, sipas mendimit tim, është vula e pejgamberëve."

Prof. Naniel Schmit¹⁹ shprehet: "Singeriteti i Muhamedit nuk mund të vihet në pyetje. Edhe një kritikë historike që nuk mbyll sytë para fakteve, që nuk pranon asnjë mendjelehtësi, që shqyrton çdo dëshmi, që nuk ka interesa të njëanshme dhe kërkon vetëm të vërtetën, duhet të pranojë se i takonte atij rendi profetësh, që çfarëdo të kenë qenë përvojat e tyre, kanë paralajmëruar, mësuar dhe shprehur mendime të thjeshta e sublime, kanë vendosur parime sjelljeje më fisnike nga të mëparshmet dhe ia kanë kushtuar veten pa pikë frike thirrjes

¹⁸ Autor i fjalorit anglisht-arabisht.

¹⁹ "Heril Enciklopedia" 1916, vol. XVI fq. 72.

së tyre të lartë, sepse drejt shërbesës së tyre fetare ishin të shtyrë nga një fuqi e brendshme.”

Profesor Parsan²⁰ thotë: “Dihet se Muhamedi (a.s.) ishte njeri i zakonshëm që nuk dinte shkrim e lexim. Ai jetoi para më shumë se 1400 vjetësh, ishte analfabet por dha sqarime dhe shpjegime të thella, që çuditërisht përputhen me shkencën. Unë, personalisht, nuk mund të them se kjo ndodhi rastësisht. Ka shumë gjëra që janë përmendur saktësisht, prandaj sikurse dr. Kith Mur, edhe unë s’e kam të vështirë që të pranoj me logjikën time se Kurani është frymëzim ose shpallje hyjnore, që i është dhënë Muhamedit (a.s.) për sqarimin e çështjeve.”

Lamartini²¹, njëri nga poetët më të mëdhenj të Francës shpreh vlerësimet e tij: “Nëse madhështia e qëllimit, thjeshtësia e mendimit dhe rezultatet e arritura janë tri kritere të gjenialitetit njerëzor, kush mund të marrë guximin të krahasojë cilindo njeri të madh të historisë njerëzore me Muhamedin (a.s.)? Muhamedi (a.s.) që përmbysës i zotave të remë, vendosës i idesë së re me fjalë, filozof, orator, mësues, ligjvënës, luftëtar për një çështje të madhe, përhapës i besimit të arsyeshëm dhe adhurimit, pa fotografi, themelues i 20 perandorive tokësore dhe i një perandorie shpirtërore. Ky është Muhamedi (a.s.). Duke marrë parasysh të gjitha kriteret me të cilat mund të matet madhështia njerëzore, me të drejtë pyesim: A ekziston njeri më i madh se ai?”

Shkrimtari i madh rus, **Leon Nikolajeviq Tolstoi**²², shprehët: “Nuk ka dyshim se Pejgamberi Muhamed është njëri ndër

²⁰ Prof. Parsan- Përgjegjës i anatomisë në një fakultet të mjekësisë në Kanada. Nga kumtesa: “Mbi fenomenin shkencor në Kuran dhe Hadith”.

²¹ Historia de la Turquie- Ulfe Aziz-us Samed, vepër e cituar, fq. 25-26.

²² Shih traktatin, “Pejgamberi urtiplotë Muhamed”- botim 1909.



reformatorët më të mëdhenj të njerëzimit. Atij i takon lavdia më e madhe që udhëzoi njerëzimin në dritën e vërtetë, në drejtësi dhe në paqe. Ai pengoi gjakderdhjen e të pafajshmëve dhe hapi rrugën e përparimit dhe prosperitetit. Këtë vepër të madhe nuk ka mundur ta bëjë askush tjetër, përveç atij njeriu i cili është i denjë për çdo respekt, admirim, konsideratë. Muhamedi (a.s.) është Pejgamber i fesë islame. Ai e ftoi popullin e vet që të adhurojë vetëm Allahun.”

Fransua Mari Voltaire (Volteri), në veprën²³ e tij historike, shkruan: “Nipi i Abdul Mutalibit, Muhamedi (a.s.), i cili më vonë do t’ia ndërrojë pamjen pjesës më të bukur dhe më të madhe të botës, ishte i ditur dhe modest, poet, astronom, reformator i kalendarit të arabëve, ligjbërës dhe mjek. Në një periudhë prej tre shekujsh, gjenialiteti i popullit arab të cilin e vuri në lëvizje Muhamedi (a.s.), bëri përparim mahnitës.”

Edwart Montet²⁴ shprehet: “Muhamedi (a.s.) me reformat e tij i ka bërë shërbim të pakufishëm njerëzimit, prandaj meriton të numërohet ndër mirëbërësit dhe reformatorët më të mëdhenj të njerëzimit.”

Dr. M. H. Duran²⁵ shprehu vlerësimet e tij, kur tha: “Pejgamberi (a.s.) ia ndryshoi të menduarit botës; madje, ia ndërroi traditat dhe moralin. Ai mblodhi arabët rreth një flamuri, një ligji, një feje, kulture, civilizimi dhe një qeverie. Ky popull i cili nuk kish nxjerrë gjatë historisë asnjë njeri të madh, meritoi të përmendet që prej shekujsh. Nën ndikimin dhe udhëzimin e Muhamedit (a.s.), ai popull nxori me mijëra e mijëra njerëz fisnikë, të cilët shkuan deri në skajet më të largëta

²³ Mbi arabët dhe Muhamedin - kapitulli VI .

²⁴ Edward Montet, La propagande Chertienne et ses Adversaires Musulmans, Paris 1890.

²⁵ Dr. M. H. Duran, sipas Dr. Imadudin Halil, vepër e cituar, fq. 105-106.

të botës, për t'i afruar njerëzit me parimet dhe moralin islam duke i ftuar ata që të pranojnë sistemin islam të jetës.

Nasri Selheb²⁶ shprehet: “Madhështia e Muhamedit (a.s.) arriti që gjatë asaj periudhe të shkurtër të formojë një legjislacion moral, shpirtëror dhe shoqëror. Askush në histori nuk ia ka arritur të bëjë një gjë të tillë me një shpejtësi të tillë marramendëse. Ky njeri, i cili nuk njohu qetësi, rehati dhe pasuri, arriti që mes një mase të tillë njerëzish, të vërë rregulla shtetformuese, të vendosë ligjin dhe të ngrrejë sisteme.”

Karen Armstrong²⁷ thekson: “Ai është një nga gjenitë më të mëdhenj që ka njohur bota. Të krijosh një kryevepër letrare, të themelosh një fe të madhe dhe një fuqi të madhe botërore, këto nuk janë arritje të zakonshme. Por, që ta çmojmë gjeninë e tij plotësisht, ne duhet të analizojmë shoqërinë në të cilën u lind dhe forcat me të cilat ai u përball...”

²⁶ Ajni Sinani, vepër e cituar, fq. 166.

²⁷ Shkrimtare angleze e ditëve tona, autore e dymbëdhjetë librave me temë nga historia e besimeve, ndër komentatoret më të shquara mbi problemet fetare në vendet anglofone. Ajo kaloi edhe shtatë vjet si murgeshë katolike. Në vitin 1983 punoi në vendet e Lindjes së Mesme për një dokumentar serial televiziv. Kështu e vlerësonin librin e saj për Muhamedin a.s. disa nga mediat e njohura botërore:

“*Publishers Weekly*”, thuhet: “Një hulumtim me shumë kujdes i historisë së Profetit Muhamed, një biografi tërheqëse dhe dashamirëse, që portretizon Profetin Muhamed, si një qenie njerëzore të dashur komplekse dhe që mund të gabojë, një udhëheqës i hirshëm që zotëronte dhunti shpirtërore dhe politike. Një Profet që vizioni dhe intuita e tij monoteiste iu përgjigjet nevojave dhe dëshirave të thella të popullit të vet.

Tek “*The Economist*” thuhet: “Ajo ka arritur të ketë sukses, sepse e ka sjellë Profetin Muhamed në jetë si një qenie plotësisht me tipare njerëzore.”

Në “*Library Journal*” thuhet: “Ky përshkrim i Profetit të Islamit dhe mjedisit prej nga ai filloi, e magjepsin lexuesin e thjeshtë dhe e çlirojnë atë nga paragjykimet, duke i dhënë një kuptim të ri ngjarjeve të sotme në Lindjen e Mesme.”



Ne në Perëndim kemi nevojë të shpëllajmë veten tonë nga paragjykimet e vjetra. Ndoshta një hap për të filluar këtë, është figura e Profetit Muhamed: për shkak të krizave që po përjeton njerëzimi dhe vështirësive me të cilat po përballlet.”²⁸

Dr. Gustav Lebon²⁹, në librin e tij shkruan: “Muhamedi (a.s.) arriti një sukses të cilin nuk e arriti asnjë nga fetë e mëparshme, që u shfaqën para tij në tokat arabe: as Hebraizmi, as Krishtërimi. Prandaj, kontributi i tij që madhështor.

Nëse madhështia e njerëzve matet me madhësinë e veprave të tyre, atëherë Muhamedi (a.s.) është nga më të madhërishtit që ka njohur historia. Tanimë, dijetarët perëndimorë kanë filluar të tregohen objektivë pavarësisht se fanatizmi fetar historianëve ua ka verbuar shumë sytë që të njohin dhe të pranojnë superioritetin e Muhamedit (a.s.) ndaj të tjerëve.”

La Fayette³⁰, filozof dhe ideator i revolucionit të madh francez të vitit 1789 dhe që ka studiuar të gjitha sistemet juridike para botimit të “Deklaratës së të drejtave të njeriut”, ka thënë: “O Muhamed! Atë që ke prurë dhe aplikuar në botë, nuk e ka bërë askush. Ti ke sjellë drejtësinë në një vend të paarritshëm. Një njeri kompleks, plot me temperament, i cili disa herë bëri gjëra që për ne është vështirë t’i pranojmë, por që pati gjeninë e një rendi shoqëror të thellë dhe themeloi një fe si edhe një traditë kulturore, emri i së cilës është “Islam” dhe që do të thotë *paqe* dhe *pajtim*.”

Tek “Choice” thuhet: “Një vlerësim i ri i shkruar bukur dhe plot forcë depërtuese, dhjetë kapitujt e të cilit i kushtojnë vëmendje të veçantë burimit fetar, eksperiencës dhe forcës shtytëse të Muhamedit.”

²⁸ Shih librin: Muhamedi, një biografi e profetit, Jehona Study Center, Tiranë 2006, fq. 66.

²⁹ Dr. Gustav Lebon- Civilizimi arab, vepër e cituar, Dr. Jusuf El Kardavi, Islamsko Provo, Sarajevo 1989 fq. 49.

³⁰ Osman Nuri Topbash, vepër e cituar fq. 28.

Përmbyllje

* Fragmentet e sipërthëna janë marrë nga shkrime e libra të autorëve të mirënjohur, personalitete në fusha të ndryshme. Ata janë politikanë, burra shtetesh, historianë, shkrimtarë, mjekë, sociologë, jetën dhe veprën e Profetit Muhamed (a.s.) e kanë parë specifikisht nga disa këndvështrime.

* Shumë prej tyre janë studiues dhe njohës të mirë të historisë së vendeve muslimane, njohës të mirë të islamistikës, kulturës, shkencës dhe të qytetërimit Islam. Fjala e tyre është thënë me vërtetësi, me përgjegjësi dhe me kompetencë shkencore.

* Shumë prej tyre nuk janë të përkatësisë islame, nuk mbartin pasione e ankthe për të vështruar dhe shkruar realitetin në mënyrë subjektive dhe të zbukuruar. Ata janë tepër objektivë dhe të paanshëm në çështjen për të cilën shkruajnë e marrin përsipër përgjegjësitë.

* Autorët e referencave e shohin dhe e analizojnë jetën dhe veprën e Profetit Muhamed (a.s.) si model dhe mesazh në të mirë të mbarënjërzimit.

* Jetën dhe veprën e Profetit Muhamed (a.s.) e nxjerrin jashtë kornizave të vendit të tij dhe të kohës kur jetoi. E shohin me vërtetësi shkencore dhe bazuar në burime të besueshme dhe dokumentacion të pasur autentik.

KAPITULLI IV

DISA MËSIMET QË NXJERRIM NGA JETA E PROFETIT (a.s.)

Lexues i nderuar!

Provo të ecësh në rrugën e drejtë, përpiku të marrësh si model të vetes sate shembullin e Profetit (a.s.), të besosh si besonte ai, të mendosh si mendonte ai, të jetosh si jetonte ai, të sillesh si sillej ai, të veprosh sipas këshillave të tij atëherë të jesh i bindur se do të gjesh kuptimin dhe qëllimin e jetës sate që të ka dhuruar i Madhi Zot, por që ta zbukuron sjellja sipas porosive të Profetit Muhamed (a.s.). Kështu ke për të gjetur qetësinë e madhe shpirtërore dhe lumturinë e vërtetë të kësaj bote dhe të botës së përtejme.

- Nëse ti je njeri i pasur, mendo për thjeshtësinë dhe bujarinë e atij Profeti (a.s.) të lartë që (sundoi mbi gjithë Gadishullin Arabik) bëri për vete gjithë njerëzit e mëdhenj të kombit arab dhe frymëzoi tërë kombësitë e tjera.

- Nëse ti je njëri prej të dobtëve, merr shembull prej jetës së Profetit (a.s.) që ka jetuar në Mekë nën regjimin e padrejtë dhe mizor të politeistëve.

- Nëse je fitimtar, merr shembull nga jeta e Profetit (a.s.) dhe guximi e mençuria e tij, që e bëri të dalë triumfues në luftërat me kundërshtarët e islamit.

- Nëse pëson humbje, kujto Profetin (a.s.) durimtar, që qëndronte me guxim e trimëri mes shokëve të rënë dëshmorë apo të plagosur në fushën e betejës.

- Nëse je mësues, mendo për Profetin (a.s.) që u mësonte shokëve urdhrat hyjnorë, duke u përcjellë frymëzimin e zemrës së tij të ndjeshme.

- Nëse je nxënës, mendo për Profetin (a.s.) që rri para engjëllit Xhibril, kur ai i sjell shpalljen e Allahut.

- Nëse je predikues që jep këshilla apo një udhëheqës i popullit, dëgjo Profetin (a.s.) që u rrezaton urtësi shokëve të tij brenda Xhamisë Profetike.

- Nëse kërkon të mbrosh të vërtetën, të kumtosh të vërtetën, ta kapësh të vërtetën e ta lartësosh atë dhe për këtë nuk ke ndonjë udhëzues, atëherë mëso nga jeta e Profetit (a.s.), kur ndodhej në Mekë pa asnjë lloj ndihme, ua shpalli idhujtarëve të vërtetën dhe fitoi në rrugë të drejtë.

- Nëse je fitimtar dhe ke mundur armikun, kujto Profetin (a.s.) ditën e fitores së Mekës se si i trajtoi me butësi dhe drejtësi kundërshtarët e tij.

- Nëse je pronar, kujto Profetin (a.s.) se si gjithë pronën dhe pasurinë e tij e vuri në shërbim të njerëzve në nevojë.

- Nëse je tregtar, merr shembull nga Profeti (a.s.) se si e zhvillonte tregtinë me ndershmëri e drejtësi, pa asnjë spekulim.

- Nëse je gjykatës, mendo zgjidhjet me zgjuarsia dhe drejtësi, ashtu si edhe Profeti (a.s.) gjeti zgjidhjen dhe shoi grindjen midis fisve për vendosjen e Gurit të zi në Qabe.



- Nëse je pushtetar, shih Profetin (a.s.) që rri midis njerëzve dhe i trajton si të barabartë të pasurit dhe të varfrit, shih se si i respektonte dhe kujdesej ai për njerëzit.
- Nëse je kryefamiljar, bashkëshort apo prind, mëso nga sjellja, kujdesi dhe dashuria e Profetit (a.s.) për familjen e vet.
- Nëse je i ditur, mëso nga shembulli i Profetit (a.s.) për ta vlerësuar, për ta shtuar dhe përhapur diturinë edhe tek të tjerët.
- Nëse je i paditur, bëj përpjekje për të mësuar, mëso nga të diturit dhe nga ata që kanë njohuri më shumë.
- Nëse je i varfër, mos u dëshpëro, por përpiku të fitosh pasuri në rrugë të nderhme dhe duke punuar.
- Nëse je i lumtur, mendo se atë ta ka dhuruar Allahu i Madhëruar dhe shijoje atë brenda normave dhe udhëzimeve të Allahut, por mendo edhe për ata që preken nga fatkeqësi dhe hidhërime.

KRONOLOGJIA E PROFETIT (a.s.)

- **Viti 570:** Lindja e Muhamedit në Mekë. Fëmijëria e tij është ajo e një jetimi të vetmuar.
- **Viti 576:** Pas vdekjes së nënës, Amina, gjyshi i tij, Abdyl Muttalibi, u bë kujdestar i tij; dy vjet më vonë, detyrën e kujdestarit e mori përsipër xhaxhai i tij, Ebu Tâlibi.
- **Viti 582:** Udhëtimi i parë tregtar në Siri, i shoqëruar nga Ebu Tâlibi.
- **Viti 595:** Martesa me Hatixhen.
- **Viti 595:** Lind djali i tij i parë, Kasimi, i cili vdes para moshës dyvjeçare.
- **Viti 605:** Muhamedi ndihmon në rindërtimin e Qabesë.
- **Viti 610:** Engjëlli Xhibril viziton Muhamedin në shpellën e Hira-s. Shpallja e vargut të parë kuranor: *Ikra* (Lexo!). Hatixhja, Aliu, Ebu Bekri dhe Zejdi u bënë muslimanë.
- **Viti 613:** Fillon shpallja publike e Islamit.
- **Viti 615:** Shpërngulja e parë (hixhreti) e një grupi muslimanësh në Abisini.
- **Viti 616:** Përndjekjet fillojnë. Muhamedi, familja dhe besnikët e tij u bojkotuan nga banorët e Mekës.
- **Viti 619:** Viti i dëshpërimit: Hatixhja dhe Ebu Tâlibi vdesin. Predikimi i Muhamedit (a.s.) i drejtohet Taifit.
- **Viti 621:** Udhëtimi natën nga Meka në Jeruzalem (*el isrâ'*) dhe ngjitja përtej shtatë qiejve (*el mi'râxh*). Persekutimet dhe kërcënimet intensifikohen. Përgatitjet për nisjen në Jethrib.



- **Viti 1H/622:** Profeti emigron dhe pritet në Medinë. Përpunohet një Kushtetutë e re për banorët e qytetit.
- **Viti 2H/623:** Ndërrohet *Kibla*. Drejtimi i faljes nuk është më nga Xhamia Aksa e Jeruzalemit, por nga Qabeja, në Mekë. Besimtarëve u jepet leja për të luftuar. Beteja e Bedr-it, një fitore e madhe për muslimanët.
- **Viti 3H/625:** Beteja e Uhud-it; muslimanët pësojnë disfatë.
- **Viti 5H/627:** Beteja e Aleatëve (kështu quhet beteja e Hendekut): rrethimi i gjatë i Medinës u realizua nga dhjetë mijë kurejshitë.
- **Viti 6H/628:** Marrëveshja e Hudejbije-s, pushimi i përkohshëm i luftimeve midis Profetit (a.s.) dhe politeistëve.
- **Viti 7H/629:** Letra që Profeti i dërgoi Kisra-s, mbret i Persisë, perandorit të Bizantit, si dhe udhëheqësve të tjerë, për t'i ftuar ata në Islam.
- **Viti 8H/629:** Çlirimi i Mekës nga një ushtri e fortë, e përbërë nga dhjetë mijë muslimanë. Amnistia e përgjithshme dhe shkatërrimi i idhujve.
- **Viti 10H/632:** Haxhillëku i fundit i Profetit (a.s.). Shpallja e plotë e Kuranit. Vdes Profeti (a.s.).

PASTHËNIE

Jeta e Profetit Muhamed (a.s.), një personalitet që ka lënë gjurmë të pashlyeshme në historinë e njerëzimit, ka qenë viteve të fundit në epiqendër të diskutimeve dhe e debateve të rretheve mediatike, shkencore e kulturore, lindore e perëndimore, islame dhe jo islame. Ai jo vetëm në kohën kur jetoi, por edhe gjatë gjithë periudhave të mëvonshme e, madje, edhe në situatat bashkëkohore ngacmon kureshtjen, rrit polemikat e përplas opinionet. Gjithmonë e më shumë njerëzimi po bindet për përmasat e kësaj figure madhore që ka kapërcyer muret kohore dhe hapësinore.

Në çdo kohë nuk mund të gjendet asnjë personalitet në botë që të krahasohet me Profetin Muhamed (a.s.) si burrë shteti, si komandant dhe strateg largpamës, si mbrojtës i të drejtave njerëzore, si reformator në shoqëri, familjar, mik, shok, e mbi të gjitha, si i besuari dhe i Dërguari i Allahut dhe i ngarkuari me një mision të shenjtë për gjithë njerëzimin. Çdo qenie e ndershme njerëzore gjen prehjen e qetësinë shpirtërore kur lexon, mëson dhe udhëhiqet nga cilësitë dhe virtytet e larta morale të këtij personaliteti. Jeta e tij i ngjan një oqeani të pafund i mbushur me margaritarë. Për t'i fituar këto margaritarë, duhet të notosh në këtë oqean dhe të zhytesh në thellësitë e tij. Duhet të lexosh për jetën e tij dhe të meditosh. Në rrugëtimin e gjatë të njerëzimit Profeti Muhamed (a.s.) ka lënë gjurmë të pashlyera. Provo të ecësh në këto gjurmë e do të gjesh qetësinë shpirtërore, do të ndjesh flladin e një pranvere të përherëshme.



Në këtë rrugë ecën shokët e tij dhe të gjithë ata që përqaftuan dhe përqafojnë besimin islam. Allahu thotë në Kuran: *“O Profet! Ne të kemi dërguar ty si dëshmitar, sjellës të lajmit të mirë dhe paralajmërues; si thirrës, që i fton njerëzit në rrugën e Allahut me urdhrin e Tij dhe si pishtar ndriçues.”* (El-Ahzab, 45-46)

Jeta e të dërguarit të fundit të Allahut është një histori e shkruar, e rrëfyer, e mësuar, e studiuar, e provuar dhe shumë komplekse. Ai pati një veprimtari dhe përvojë tepër aktive. Ai i dha njerëzimit një ndihmesë të konsiderueshme në fushën e marrëdhënieve dhe jetës shpirtërore.

Ky është një fakt thelbësor, i dukshëm që jo vetëm nuk mund të mohohet, por as edhe të nënvlerësohet. Për jetën e tij ekzistojnë të dhëna më shumë se për çdo themelues të ndonjë besimi tjetër. Këto të dhëna janë të bollshme për të plotësuar kuadrin historik të këtij personaliteti.

Muhamedi (a.s.) kishte dhunti të mëdha shpirtërore dhe politike. Ai ishte i bindur se besimtarët kanë përgjegjësi për të ndërtuar një shoqëri më të mirë dhe më të drejtë.

Pas vitit 622 e.r. Muhamedi (a.s.) u bë një figurë popullore. Duke përballuar me durim vite persekutimi, ai arriti përmasat e një udhëheqësi që jo vetëm transformoi Arabinë, por ndryshoi edhe rrjedhat historike. Ai nuk lindi në një shoqëri paqësore e të rregulluar, por në një mjedis të ngarkuar me konflikte. Së pari, ai ideoi bashkimin e arabëve jo sipas skemave të mëparshme, por në gjetjen e zgjidhjeve origjinale sipas situatave. Kjo ishte një nga vetitë themelore të personalitetit të tij. Ai bënte hapa të matur, të menduar mirë dhe të suksesshëm. I gjithë dimensionin dhe funksionin e tij politiko-social udhëhiqet nga libri i shenjtë, Kurani, mësimet e të cilit, bashkë me trashëgiminë e Muhamedit (a.s.) shërbejnë si bazë e legjislacionit islam. Mesazhi i tij njerëzor ishte njësh me vizionin e tij social e fetar.

FJALORTH

- **Abasi** - Njëri nga xhaxhallarët e Profetit Muhamed (a.s.). Kaloj në Islam dhe iu bashkua muslimanëve në çastet e para të çlirimit të Mekës prej muslimanëve.
- **Abdullahu** - Abdullah ibën Abdul-Muttalib, djali më i ri i Abdul-Muttalibit. Babai i Profetit Muhamed (a.s.).
- **Abdullahu** - Një prej fëmijëve meshkuj të Profetit (a.s.). Vdiq në moshë të vogël, përpara shpalljes së Islamit.
- **Abdul-Menafi** - Djali i Kusajjit; u bë prijës i kurejshëve pas vdekjes së të atit.
- **Abdul-Muttalibi** - i biri i Hashimit. Zuri vendin e të atit, duke përfaqësuar parinë e kurejshëve. Ai hapi rishtas burimin e Zemzemit.
- **Abisinia** - Etiopia e sotme; vendi ku u vendosën për të parën herë emigruesit muslimanë.
- **Aishja** - Bashkëshortja më e re në moshë e Profetit Muhamed (a.s.) dhe e bija e Ebu Bekrit.
- **Aksa** - Mesxhidul Aksa, Xhamia e Largët në Jeruzalem, një nga tre faltoret më të shenjta për muslimanët.
- **Aliu** - Djali i Ebu Talibit, kushëri i parë i Profetit (a.s.). I pari që pranoi Islamin nga fëmijët. Prijësi i katërt i muslimanëve, për nga radha, pas vdekjes së Profetit (a.s.).
- **Allahu Ekber** - Thënie që shpreh madhërimin e Allahut: “Zoti është më i Madhi”.
- **Amina** - Emineja, nëna e Profetit (a.s.). Amina bint Uehb.
- **Amër bin El Asi** - Shok i Muhamedit (a.s.) nga gjenerata e parë; njeri i mençur i fisit Kurejsh; u dërgua në Abisini për



t'i kthyer prapë të shpërngulurit e parë muslimanë. Më vonë u bë njëri nga luftëtarët dhe drejtuesit më të shquar të Islamit.

- **Arabia** - Emërtim për atë zonë që përfshin të gjitha territoret e njohura të Gadishullit Arabik.
- **Arafat** - Luginë e gjerë e rrethuar nga kodra, ndodhet në periferi të Mekës. Vendi ku tubohen haxhilerët muslimanë në ditën e nëntë të muajit Dhul-Hixhe, për të kryer një nga ritualet e haxhit, duke qëndruar në të prej agimit të mëngjesit të asaj dite deri pas perëndimit të diellit.
- **Beduinë** - Arabët nomadë - banorë të shkretëtirës, që zakonisht janë barinj.
- **Behira** - Murg që jetonte në qytetin Busra (në Siri), ku ndaloi karvani në të cilin qe Profeti (a.s.), përpara se atij t'i zbriste shpallej hyjnore.
- **Benu Hashim** - Degë e fisit të madh Kurejsh, të cilës i përkiste edhe Profeti (a.s.).
- **Benu Kurejdha** - Fis hebre që jetonte në Jethrib (Medinë) në kohën kur Profeti emigroi drejt saj. Nënshkruan një marrëveshje me Profetin (a.s.), të cilën e shkelën disa herë, duke e detyruar atë që t'u shpallte luftë.
- **Bilal El Habeshij** - Rob i Umejje bin Halefit. Ai u bë musliman kundër dëshirës së padronit të vet dhe për pasojë, vuajti shumë ndëshkime të rënda, por kurrë nuk e humbi besimin e tij. Më vonë u bë edhe muezini i parë.
- **Bismilahirr Rrahmanirr Rrahim** - Frazë të cilën besimtari duhet ta thotë në fillim të çdo veprimi të mirë dhe të çdo kapitulli të Kuranit (përveç kapitullit IX) dhe që ka si kuptim "Me emrin e Allahut, të Gjithëmëshirshmit, Mëshirëplotit".
- **Bizanti** - Kështu quhej perandoria romake e lindjes.
- **Burak** - Emri i një kafshe, më të madhe se gomari e më të vogël se mushka, që mbarti Profetin (a.s.) gjatë ngritjes së tij në qiell (Mir'axhit).
- **Ebrehe** - Mbreti i Jemenit, i cili, shoqëruar nga një ushtri e

madhe, ndërmori një mësymje për të shkatërruar vendin e shenjtë, Qabenë.

- **Ebu Bekri** - Tregtar i pasur dhe i nderuar në Mekë. Shok dhe bashkëkohës, miku më i mirë i Profetit (a.s.). Burri i parë që i besoi Profetit (a.s.) dhe pranoi Islamin. E pasoi atë (a.s.) pas vdekjes, duke udhëhequr muslimanët për një periudhë dyvjeçare, derisa ndërroi jetë.
- **Ebu Lehebi** - Njëri nga xhaxhallarët e Profetit (a.s.), por dhe një armik i ashpër i Islamit dhe i nipit të vet. Në Kuranin Famëlartë ka edhe një kapitull që e përmend atë, kapitulli i 111-të.
- **Ebu Sufjani** - Njëri nga udhëheqësit kurejshitë, që u priu mosbesimtarëve në luftërat e tyre kundër Profetit (a.s.) dhe Islamit. Në fund, gjatë çlirimit të Mekës, e pranoi Islamin.
- **Ebu Talibi** - Xhaxhai i Profetit (a.s.), i ati i Aliut. Njëri nga njerëzit më të ndershëm në mesin e kurejshëve. U kujdes dhe mbështeti Profetin (a.s.) pas vdekjes së gjyshit të tij dhe nuk reshti së mbrojturi atë derisa vdiq. Megjithatë nuk e pranoi Islamin.
- **Ebu Xhehli** - Njëri prej njerëzve më të fuqishëm të fisit Kurejsh, kundërshtar i hapur i Profetit (a.s.) dhe Islamit. U vra në betejën e Bedrit, viti 2 H/623.
- **El-Buhari** - Muhamed bin Ismail bin Ibrahim bin El Mugire El Buhari. Lindi në vitin 194 H / 810 e.s. në qytetin e Buharasë, Uzbekistani i sotëm dhe vdiq në një nga fshatrat e Samarkandës të quajtur Hartank në vitin 256 H / 870-871 e.s.. Ai u rrit jetim dhe që në vogëli nisi rrugën e dijes. Mësoi nga më shumë se një mijë dijetarë dhe përpiloi përmbledhjen më të njohur me thëniet profetike “El Xhami’us Sahih”, e cila konsiderohet nga dijetarët e botës islame si libri më i saktë, pas Kuranit të Madhërishëm.
- **El-Isrâ’** - Israja është udhëtimi i mrekullueshëm që bëri Profeti (a.s.) i shoqëruar prej engjëllit Xhibril, gjatë një nate, prej Xhamisë së Shenjtë në Mekë (Qabja), për në Xhaminë



e Largët në Jeruzalem (Mesxhidul Aksa).

- **El Mi'râxh** - Miraxhi është udhëtimi qiellor i Profetit (a.s.) në shoqërinë e engjëllit Xhibril.
- **Emine** - Shih Amina.
- **Ensarë** - Përkrahës - titull për banorët vendas të Medinës, të cilët e merituan atë, sepse pranuan Islamin dhe ftuan Profetin (a.s.) dhe muslimanët që emigruan nga Meka, për të jetuar bashkë me ta në Medinë.
- **Es Selamu alejkum ue rrahmetullahi ue berekatuhu** - Përhëndetje islame që ka si kuptim "Paqja, mëshira dhe bekimet e Allahut qofshin për ju".
- **Ezani** - Thirrje islame që, kryesisht bëhet për të sinjalizuar besimtarët për hyrjen e kohës së faljes së namazit.
- **Faltore** - Vend ku falen besimtarët e një kulti fetar.
- **Fatime** - Vajza e vogël e Profetit (a.s.). U martua me Aliun, djalë të xhaxhait të Profetit (a.s.) dhe pati me të dy djem, Hasanin e Hysenin. Vdiq pak kohë pas vdekjes së Profetit (a.s.).
- **Guri i zi** - "El Haxherul Esved" është një gur i fiksuar në një nga katër këndet e ndërtesës së shenjtë, Qabes. Për të Profeti Muhamed (a.s.) ka thënë se ka zbritur nga Xheneti. Gjithashtu, ky gur shënon fillimin dhe mbarimin e një rrotullimi rreth Qabes.
- **Hadith** - Shprehje apo thënie që e ka thënë Profeti (a.s.) apo veprë që e ka bërë ai ose të tjerë dhe ai e ka miratuar me heshtjen e tij.
- **Halid bin El Uelidi** - Luftëtar i madh, shumë i shkathët në artin ushtarak. Islamin nuk e pranoi që në fillim, madje planifikoi disfatën që pësuan muslimanët në betejën e Uhudit; por më vonë e pranoi Islamin, duke u bërë një prej udhëheqësve ushtarakë më të shquar të muslimanëve.
- **Halimja** - Grua e fisit beduin të Beni Sa'ad, e cila u përkujdes për Profetin (a.s.) në fëmijërinë e tij.
- **Hamza** - Një prej xhaxhallarëve të Profetit (a.s.), ishte tepër i guximshëm dhe trim. Luftoi përkrah Profetit (a.s.) në

betejën e Bedrit dhe ra dëshmor në Betejën e Uhudit.

- **Haruni** - Vëllai i të dërguarit të Zotit te populli i Izraelit, Musait (a.s.). Edhe ky u bë profet, falë lutjes bujare të Musait (a.s.) drejtuar Allahut të Madhërishëm.
- **Hashimi** - Djali i Abdul-Menafit dhe stërgjysh i Profetit (a.s.). Ai organizonte udhëtimet e karvanëve të kurejshëve për në Siri dhe Jemen. Për rrjedhojë, Meka u bë qendër e madhe dhe e rëndësishme tregtare.
- **Hatixhja** - Gruaja e parë e Profetit (a.s.); Ai qëndroi me të derisa ajo vdiq. Ishte e para femër që i besoi Profetit (a.s.).
- **Haxh** - Pelegrinazhi në vendin e shenjtë, në Mekë. Ai është një nga pesë shtyllat e Islamit, detyrim për t'u kryer qoftë edhe një herë të vetme në jetë nga çdo musliman që ka mundësi ekonomike dhe shëndetësore.
- **Haxher** - Gruaja e dytë e profetit Ibrahim (a.s.) dhe nëna e djalit të tij të parë, profetit Ismail (a.s.), paraardhës i Muhamedit (a.s.).
- **Herakli** - Perandor i Bizantit.
- **Hindi** - Gruaja e Ebu Sufjanit dhe nëna e Muavijes. Pranoi Islamin në vitin 8 H, vit në të cilin muslimanët çliruan përfundimisht Mekën nga sundimi i paganizmit.
- **Hira** - Shpellë e vendosur në kreshtën e një kodre, ku për herë të parë i zbriti Shpallja Muhamedit (a.s.)
- **Hixhreti** - El Hixhrah; shpërngulja e besimtarëve muslimanë nga Meka në Medinë. Me këtë ngjarje, zë fill edhe kalendari musliman.
- **Isai** - I biri i Merjemes që lindi pa baba dhe i dërguari i Zotit tek "delet e humbura të Izraelit". U dërgua për të mëkëmbur ligjet që i pat vendosur Musai (a.s.), por që me kalimin e kohës u shtrembëruan dhe u manipuluan nga priftërinjtë çifutë.
- **Ibrahimi** - I dërguar i Allahut të Madhëruar për popullin e tij. Ai konsiderohet në literaturën islame, por jo vetëm në të, si baba i profetëve. Pati si fëmijë, Ismailin me Haxher-



en dhe Is'hakun me Sarën. Prej Ismailit e kanë prejardhjen arabët dhe prej Is'hakut e kanë hebrenjtë.

- **Ithtarët e Librit** - Term që përfshin ithtarët e dy besimeve të tjera monoteiste, hebrenjtë dhe të krishterët.
- **Imam** - 1. Njeri i ditur, që u prin besimtarëve muslimanë në kryerjen e faljeve. 2. Kryetari shpirtëror i të gjithë muslimanëve ose i ndonjë grupi të tyre.
- **Ismaili** - I biri i Ibrahimit dhe profet i përmendur në Kur'an. Ai ishte kurban për të cilin qe betuar Ibrahim (a.s.).
- **Inxhili** - Ungjilli, libër i shenjtë që i zbriti të dërguarit të Zotit, Isait (a.s.).
- **Jahja** - Profet i Zotit i zgjedhur nga mesi i bijve të Izraelit. Bashkëkohës i Isait (a.s.). Jetoj dhe predikoi besimin e fenë e drejtë, derisa u ekzekutua nga vetë populli izraelit.
- **Jemeni** - Vend me popullsi arabe, që ndodhet në jug të Gadishullit Arabik.
- **Jusufi** - Profet i Zotit, i zgjedhur nga populli i Izraelit, kaloi shumë vuajtje në fëmijërinë dhe rininë e tij, deri në burgosje, por që në fund u shpërblyen nga Zoti i Madhëruar, duke e bërë atë një figurë shumë të rëndësishme në oborrin e faraonit. Gjatë kohës kur ai qe ministër, mori në mbrojtje popullin hebre.
- **Kâsim** - Djalë i parë i Profetit (a.s.) me Hatixhen. Vdiq në moshë të njomë, përpara se të atit t'i zbriste shpallja.
- **Kibla** - Përfaqëson orientimin e detyruar të muslimanëve në drejtim të Qabesë (Mekës), gjatë kryerjes së ritualit të faljes.
- **Kopt** - Egjiptian autokton i krishterë.
- **Kurejsh** - Njëri prej fiseve më të shquara arabe që kishte për vendbanim qytetin e shenjtë të Mekës, pasardhës të Ismailit (a.s.). Edhe profeti Muhamed (a.s.) i përkiste këtij fisi.
- **Kusajji** - Një nga udhëheqësit e fisit kurejsh, i cili u bë sundues i Mekës. Ai ruante gjithashtu, çelësat e Qabesë. (Stërgjysh i stërgjyshit të Profetit Muhamed a.s.).
- **Kurani** - Fjala e Allahut të Madhëruar që iu shpall Profetit

- (a.s.) për një periudhë 23-vjeçare, përmes engjëllit Xhibril.
- **Lejletul Kadri** - Nata e Caktimit. Në këtë natë, Allahu i Madhëruar ka filluar t'i shpallë Kuranin Muhamedit (a.s.). Ajo është një nga netët teke të 10-ditëshit të fundit të muajit Ramazan. Gjatë asaj nate, engjëjt zbresin me të gjitha vendimet hyjnore për çfarë do të ndodhë në Tokë brenda një viti.
 - **Medina** - Vend në të cilin u shpërngulën muslimanët bashkë me Profetin Muhamed (a.s.) për të krijuar shtetin e parë islam.
 - **Meka** - Qyteti i shenjtë në të cilin ndodhet Qabja - Shtëpia e Zotit. Vendlindja e profetit Muhamed (a.s.), si dhe vend pelegrinazhi për mbarë muslimanët e botës.
 - **Merjem** - Nëna e Isait (a.s.). Njëra nga gratë më të vlerësuara në Islam dhe më e lëvduara në Kuran.
 - **Muslimi** - Muslim ibën El-Haxhaxh ibën Muslim El-Kushejrij En-Nisaburi. Lindi në vitin 204 H, vit në të cilin vdiq imam Shafiu, në krahinën e Neshapurit dhe vdiq në vitin 261 H. Është autor i përmbledhjes me thënie profetike, të titulluar "El-Kitab Es-Sahih ", i cili renditet pas veprës së Buhariut për nga saktësia, përpikëria shkencore dhe vlerat që ai përcjell.
 - **Minare** - Kullë e lartë prej së cilës bëhet thirrja që sinjalizon besimtarët për kryerjen e faljes.
 - **Musai** - Profeti më i madh që iu dërgua popullit të Izraelit.
 - **Nexhashi** - Mbret i Abisinisë në kohën e Profetit (a.s.). Njeri i drejtë dhe besimtar.
 - **Oazë** - Vend me ujë dhe i gjelbëruar në mes të shkretëtirës, ku mund të jetojnë njerëzit.
 - **Persia** - Mbretëri e hershme paraislame e pozicionuar në territoret e Iranit të sotëm.
 - **Rukaje** - Njëra nga vajzat e profetit Muhamed (a.s.). Vdiq para vdekjes së të atit.
 - **Safa** - Kodrinë pranë Qabesë, prej nga nis ecja rituale



ndërmjet Safas dhe Mervas.

- **Sahabi** - Shok i Profetit. Sipas përkufizimit përkatës, këtë titull e meriton kushdo që e ka takuar Profetin (a.s.), duke besuar atë, si dhe ka vdekur si musliman.
- **Sara** - Gruaja e profetit Ibrahim, me të cilën atij i lindi Is'haku.
- **Selman Farisiu** - Sahabi i nderuar në mesin e muslimanëve, me origjinë nga Persia. Shpeshherë Profeti e konsultonte në çështje dhe probleme që u përkisnin ithtarëve të Librit dhe muslimanëve.
- **Sidretul Munteha** - Lotusi i skajit më të largët, që simbolizon edhe fundin e qiejve.
- **Sure** - Kapitull kuranor.
- **Sham** - Krahinë e populluar tradicionalisht nga arabët, me dalje në detin Mesdhe dhe që në kohët e sotme përfshin disa shtete arabe: Libanin, Sirinë, Palestinën dhe një pjesë të Jordanisë.
- **Tavaf** - Ecja rituale rreth e përqark Qabes.
- **Teurati** - Torahu- Libër i shenjtë që i zbriti të dërguarit të Zotit, Musait (a.s.).
- **Theur** - Shpella ku u fshehën Muhamedi (a.s.) dhe Ebu Bekri, kur emigruan nga Meka për në Medinë.
- **Umu Kulthum** - Njëra nga bijat e Muhamedit (a.s.). Vdiq para vdekjes së të atit.
- **Uraka bin Neufel** - Djali i xhaxhait të babait të Hatixhes, gruas së Profetit (a.s.). Emri i tij është përmendur në shumë shkrime, qofshin islame, apo të krishtera. Të gjitha përkojnë në faktin që Uraka ishte njohës i Ungjillit.
- **Uhud** - Mal në rrethinat e Medinës, pjesë e vargmalit të Hixhazit, në rrëzë të të cilit u zhvillua beteja e njohur e Uhudit, ku muslimanët pësuan një humbje të konsiderueshme.
- **Zekat** - Obligim i domosdoshëm fetar ndaj çdo muslimani, pasuria e të cilit e ka plotësuar sasinë e caktuar (nisabin), si dhe ka kaluar një vit.

- **Zejnebe** - Njëra nga bijat e Muhamedit (a.s.), e cila si shumica e fëmijëve të tij, ndërroi jetë që në të gjallë të tij.
- **Xhami** - Faltore e besimtarëve muslimanë.
- **Xhibrili** - Meleku, engjëlli i ngarkuar prej Allahut të Madhëruar me detyrën e komunikimit të Zbulesës Hyjnore tek profetët e ndryshëm. Ai i transmetoi Muhamedit (a.s.) Kuranin famëlartë, ashtu siç e dëgjoi prej Allahut.
- **Xhenet** - Streha e besimtarëve në botën e përtejme, ku do të jetojnë në begati dhe kënaqësi të pafundme dhe të paimagjinueshme, si shpërblim i besimit dhe i punëve të tyre të mira në këtë botë.

LITERATURA E PËRDORUR

Të gjitha ajetet kuranore janë marrë nga Kurani i Madhërishëm, sipas përkthimit të Prof. Hasan I. Nahit, botuar nga Instituti Shqiptar i Mendimit dhe i Qytetërimit Islam, Tiranë, 2006.

- Bernard Show, *The Genuine Islam*, vol. 1 nr. 81936.
- Leon Nikolajevič Tolstoi, Traktat: *Pejgamberi urtiplotë Muhamed*.
- Volteri, *Mbi arabët dhe Muhamedin*. (Voltaire-F.M. Arouet-Mahomet 1741)
- Thomas W. Arnold, *Historia e Përhapjes së Islamit*.
- John Davenport, *Apologjia për Muhamedin dhe Kuranin*.
- Michael H. Hart, *100 personalitetet më të shquara të historisë*.
- Martin Lings, *Muhamedi: jeta e tij e bazuar mbi burimet më të hershme*.
- Stanley Lane Pole, *Fjalimi dhe Kuvendimi i Muhamedit*.
- John Austin, *Muhamed the Prophet of Allah*, botim 1927.
- R. Bosworth Smith, *Jeta e Muhamedit*.
- Anie Besant, *The Life and Teaching of Muhammad*, Madras 1932.
- E. Demergen, *Biografia e Muhamedit, Muhamedi dhe Suneti*.
- Thomas Carlyle, *Heroi si Profet: Muhamedi dhe Islamizma*, 1840.
- W. Montgomery Watt, *Muhamedi në Mekë, Muhamedi në Medinë*, botim 1953.
- Karen Armstrong, *Muhamedi (një biografi e Profetit)*, botim 2006.
- Maksim Rodinson, *Muhamedi*.
- Amër Halid, *Gjurmëve të të dashurit tonë*.

- M. H. Rahim, *Muhamedi (a.s.)*.
- Osman Nuri Topbash, *Muhamedi*, botim 2003.
- Sejjid Husein Nasr, *Muhamedi, njeri i Allahut*.
- Dr. Abdullah Ali Basfar, *Mëshira e dhuruar - Dashuria dhe mbrojtja e Profetit*, botim 2006.
- Bashkim Aliu, *Muhamedi (a.s.) pishtari ndriçues*, botim 2000.
- Said Nursi, *Profeti Muhamed (a.s.) dhe rruga e tij*.
- Dr. Mustafa Sibai, *Profeti Muhamed*, botim 2005.
- Safijjurrehman El-Mubarekfuri, *Nektari i vulosur i Xhenetit*.
- Mehmed Hanxhiq, *Muhamedi*.
- Leila Azzam - Aisha Gouverneur, *Jeta e të Dërguarit (a.s.)*.
- Zakaria Bashier, *Makkan Crucible Sunshine at Madinah*.
- Mardijah Aldrich Tarantino, *Marvellous stories from the life of Muhammad*.
- Ramokrishna Rao, *Muhamedi Pejgamberi i Islamit*.
- Ajni Sinani, *Të tjerët mbi Islamin*, botim 2001.
- Muhamed ibn Ismail El-Buhâri, *El-Xhâmiu Es-Sahih*, International Ideas Home for Publishing & Distribution, viti i botimit 1998, Rijad.
- Muslim ibn El-Haxhaxh El-Kusheri En-Nisâpori, *Es-Sahih*, International Ideas Home for Publishing & Distribution, viti i botimit 1998, Rijad.
- Abdulmelik Ibn Hishâm El-Himjeri El-Meârefi, *Es-Sirah En-Nebeuijah*, Dâr El-Xhijl, viti i botimit 1990, Bejrut.
- Safijjurrehman El-Mubârekfuri, *Er-Rahik El-Makhtûm*, Dâr Es-Selam, viti i botimit 1997, Rijad.
- Shemsuddin Muhamed ibn Ahmed ibn Othman Edh-Dhehebi, *Nuzhetul-Fudalâ Tehdhib Sijer Alâm En-Nubelâ*, Dâr El-Andalus El-Khadrà, viti i botimit 2000, Xheddah.
- Ebul-Fida Ibn Kethir, *El-Bidajetu Ue En-Nihajetu*, Dar El-Hadith, viti i botimit 1992, Kajro.
- Ebu Bekr El-Xhezairi, *Hadha El-Habib Muhamed (s.a.u.s.)*, Dar Esh-Shurûk, viti i botimit 1989, Xheddah.
- Muhamed ibn Aleui El-Maliki El-Haseni, *Muhamed El-Insân El-Kâmil*, Dâr Esh-Shurûk, viti i botimit 1984, Xheddah.



Thënie profetike



Unë jam dërguar si mëshirë, jo si mallkues.



Kije frikë Allahun kudo që të jesh; pas çdo vepre të keqe bëj një vepër të mirë që ta fshish atë. Dhe me njerëzit, sillu me moral të lartë.



Kush beson Allahun dhe ditën e fundit, le të thotë fjalë të mira ose të heshtë! Kush beson Allahun dhe ditën e fundit, le ta respektojë fqinjin e tij. Kush beson Allahun dhe ditën e fundit, le ta nderojë mikun e tij!



Padyshim që Allahu ju ka lënë juve porosi për nënat tuaja. Pastaj për nënat tuaja. Pastaj për nënat tuaja. Pastaj për baballarët tuaj. Pastaj për të afërmit tuaj, sipas shkallës së afërsisë.



Midis një dinari (monedhë) që e shpenzon në rrugën e Zotit, një dinari që e shpenzon për lirim e një skllavi, një dinari që e shpenzon për të varfrit dhe një dinari që e shpenzon për familjen tënde, ai që të sjell më shumë shpërblime, është ai që e shpenzon për familjen tënde.




Allahu i madhëruar ka thënë: “Ata persona që duhen për Hirin Tim, që mblidhen në një vend për Hirin Tim, që vizitojnë njëri-tjetrin për Hirin Tim dhe që shpenzojnë për njëri-tjetrin për Hirin Tim, atëherë Dashuria ime është bërë obligim për ta.”




Zoti e ka ndarë mëshirën në 100 pjesë, nëntëdhjetë e nëntë prej të cilave i ka mbajtur tek Vetja, kurse një tërën e ka zbritur në Tokë. Është falë asaj pjese të vetme, që krijesat tregojnë mëshirë për njëra-tjetrën, aq sa mëma e ngre këmbën për të mos shkelur të voglin e saj.



Besimtarët me besim më të përsosur, janë ata që kanë moral të lartë. Më i miri prej jush është ai që sillet më mirë me gruan e tij.






Askush prej jush nuk ka arritur besimin e vërtetë, përderisa të dëshirojë për vëllanë e tij atë që dëshiron për veten e tij.



Mos e kini zili njëri-tjetrin, mos e mashtroni njëri-tjetrin, mos e urreni njëri-tjetrin, mos ia ktheni shpinën njëri-tjetrit; o robërit e Zotit, jini vëllezër. Nuk i lejohet një muslimani të braktisë vëllanë e vet më shumë se tri ditë.



Kush nuk mëshiron njerëzit, nuk e mëshiron Allahu.



Besimtari për besimtarin është si muret e ndërtesës që mbështesin njëra-tjetrën.



Nuk është prej nesh kush nuk tregon dhembshuri ndaj fëmijëve dhe respekt ndaj të rriturve, kush nuk urdhëron të mirat dhe ndalon të këqijat!



Kush largon një brengë të kësaj bote nga një besimtar, Allahu i largon atij një prej brengave të ditës së kiametit. Kush lehtëson një person në vështirësi, Allahu ia lehtëson punën atij në dynja dhe ahiret. Kush i mbulon një të metë besimtarit, Allahu ia mbulon atij të metat në dynja dhe ahiret. Allahu ndodhet në ndihmën e robit të Tij, për sa kohë që ky e ndihmon vëllanë e vet.



Kush rrit dhe edukon pa asnjë të metë tri vajza ose tri motra, ose dy motra, ose dy vajza, sillet mirë me to dhe i marton, atëherë ai e ka merituar xhenetin.



Një nga të mirat më fisnike që mund të bëjë njeriu, është vizita e miqve të babait të tij të vdekur.






Sa herë që një njeri viziton një të sëmurë në mbrëmje, bashkë me të dalin 70000 melekë, që (i) kërkojnë falje (Zotit) për të deri në mëngjes, dhe atij i përgatitet një kopësht në xhenet. Nëse ai e viziton të sëmurin në mëngjes, bashkë me të dalin 70000 melekë, që (i) kërkojnë falje (Zotit) për të deri në darkë, dhe atij i përgatitet një kopësht në xhenet.



Shembulli i besimtarëve në dashurinë, mëshirën dhe dhembshurinë mes njëri-tjetrit, është si shembulli i një trupi të vetëm. Nëse ankohet njëri organ, organet e tjera marrin pjesë me të në pagjumësi dhe temperaturë.



Të vendosësh drejtësi mes dy personave, është sadaka. Të ndihmosh dikë të hipë në kafshën e vet ose ta ngarkojë atë, është sadaka. Fjala e mirë është sadaka. Çdo hap që hedh për të shkuar për t'u falur, është sadaka. Të heqësh nga rruga një pengesë, është sadaka.



Allahu i mëshiron ata që tregohen të mëshirshëm me të tjerët. Kini mëshirë për ata që ndodhen në tokë, që t'ju mëshirojë Ai që është në qiell.



Kush ju kërkon strehim në emër të Zotit, strehojeni; kush ju kërkon diçka në emër të Zotit, jepjani; kush ju fton, përgjigjuni ftesës së tij; kush ju bën një të mirë, kthejani po me të mirë. Nëse nuk keni gjë për t'i dhënë, atëherë lutuni për të, derisa të shihni se ia keni shpërblyer (sa duhet).



Xhibrili (a.s) më këshilloi aq me ngulm në të drejtat e fqinjëve, sa që mendova se ata do të bëheshin pjesëtarë në trashëgiminë e njëri-tjetrit.



Lehtësoni dhe mos vështirësoni, përgëzoni dhe mos tmerroni.




Shërbëtorët tuaj janë vëllezërit tuaj të afërm. Allahu i ka lënë ata amanet në duart tuaja. Kush e ka të vëllanë në dorën e tij, le ta ushqejë nga ajo që ha vetë dhe ta veshë nga ajo që vesh vetë. Mos i ngarkoni ata me punë që s'mund t'i bëjnë dot. Edhe nëse i ngarkoni, ndihmojini ata.





Nëse një musliman mbjell një pemë ose hedh një farë dhe nga frutat e këtyre ushqehen njerëzit, zogjtë ose kafshë të tjera, atëherë kjo mbetet sadaka për të.



Kush ndjek rrugën për të kërkuar dituri, Allahu do t'ia lehtësojë atij rrugën për në xhenet.



Ruajeni veten nga zjarri, qoftë edhe me një gjysmë hurme. Ai që nuk ka as kaq, (le të ruhet) me një fjalë të mirë.



Nëse ju nuk do të kryenit gjynahe, Allahu do t'ju shkatërronte dhe do të krijonte njerëz që kryenin gjynahe, por që do t'i falte pasi ata të pendoheshin dhe të kërkonin falje për çka kishin kryer.



Virtyti është morali i mirë, ndërsa mëkati është ai që ta turbullon shpirtin dhe nuk do që ta dinë të tjerët.




Nëse dikush është i privuar nga mirësjellja, atëherë është i privuar nga gjithë të mirat.



Nëse butësia ndërhyr në diçka, patjetër që zbukuron atë, por nëse del nga diçka, patjetër që e nxin atë.



“Kush prej jush sheh një të keqe, ta ndryshojë atë me dorën e vet. Nëse nuk mundet, ta ndryshojë me gojën e tij dhe, nëse nuk mundet, ta ndryshojë me zemrën e tij, por ky është *imani* më i dobët”.





Një prej fjalëve të urta që njerëzit kanë trashëguar nga profetët e mëparshëm, është: “Nëse nuk ke turp, atëherë bëj ç’të duash”.



Besimtari nuk është gjurmues gabimesh, as mallkues, as i rëndomtë, as gojështhurur dhe as i paturp.



Ai person i cili nuk ka mundur të hyjë në xhenet, megjithëse në shtëpinë e tij ka njërin ose të dy prindërit e moshuar, le të zvarritet, le të zvarritet, le të zvarritet.



M’u treguan të gjitha punët e umetit tim, të mirat e të këqijat. Midis veprave të mira, gjeta edhe largimin e pengesave nga rrugët.



Kush dëshiron ta shpëtojë Zoti nga vështirësitë e Ditës së Kiametit, le ta ndihmojë borxhliun ose le t'ia falë atij borxhet.




Nuk është trimëri të mundësh armikun në dyluftim. Trimëri është të kontrollosh veten kur je i zemëruar.



Mos nënvleftëso asnjë punë të mirë, goftë edhe ta takosh vëllanë tënd me fytyrë të çelur.



Një burrë, të cilin e kishte marrë etja gjatë udhëtimit, gjeti një pus, u fut brenda në të dhe piu ujë. Kur doli, pa një qen i cili po gulçonte dhe po gërmonte token. “Edhe ky qen duhet të jetë i etur si unë”, -mendoj me vete. U fut përsëri në pus, mbushi këpucën e tij me ujë dhe ia dha qenit. Allahu e vlerësoi për këtë dhe ia fali gjynahet.



Cip Katalogimi në BK Tiranë

Ky është Profeti Muhamed (a.s.) -
i dërguari i Zotit për mbarë njerëzimin / red. Shefik Osmani. -
Tiranë : AIITC, 2007.

... f. ; ... cm

ISBN 978-99943-917-6-9

297.163 (092)

929(532.2) [Muhammed, Profet]

Ky është Profeti Muhamed ﷺ

I dërguari i Zotit për mbarë njerëzimin

Profeti Muhamed ﷺ është një ndër personalitetet më të mëdha që ka tërhequr vëmendjen dhe vlerësimin e dijetarëve, historianëve, biografëve, shkrimtarëve jo vetëm të kohës kur ai jetoi por edhe të kohëve të mëvonshme, jo vetëm në lindje, por në tërë botën. Biografia e Profetit Muhamed ﷺ nuk është thjesht biografia e një individi, por e një besimi të predikuar prej tij, është vizioni i një epoke të re, epokës islame.

Porositë e Profetit ﷺ janë përcjellë në shekuj, brez pas brezi dhe gojë më gojë nga shokët e tij, nga dijetarët, më të diturit, më të devotshmit, më të moshuarit dhe kanë qenë mesazhe për mbarë njerëzimin. Ato kanë shërbyer si këshillë e mirë për çdo individ dhe çdo shoqëri.

Porositë e Profetit ﷺ tingëllojnë magjishëm edhe për shoqërinë bashkëkohore edhe për problematikat që ajo ka, për çështjet që kërkojnë zgjidhje për shëndoshjen e saj.